



南史  
六



リ 8  
1735  
182



1735  
182

南史卷三十一

列傳第二十一

張裕

子演 岱 岱兄子緒 緒子完 充 永子環 環子率 率弟盾

環弟稷 稷子嶧 稷從子種

張裕字茂度吳郡吳人也名與宋武帝諱同故以字稱曾祖澄晉光祿大夫祖彭祖廣州刺史父敞侍御史度支尚書吳國內史茂度仕為宋武帝太尉主簿揚州中從事累遷別駕武帝西伐劉毅北伐關洛皆居守留任州事出為都督廣州刺史平越中郎將綏靜百越嶺外安之元嘉元年為侍中都督益州刺史帝討荊州刺史謝晦詔益州遣軍襲江陵晦平西軍始至白帝茂度與晦素善議者疑其出軍遲留弟邵時為湘州刺史起兵應大駕上以邵誠節故不加罪累遷太常以脚疾出為義興太守上從容謂曰勿以西蜀介懷對曰臣不遭陛下之明墓木拱矣後為都官尚書以疾



冊八年  
諸田一人  
山同  
新購以贈



甄川屯鳳  
氏蘭向甫

就拜光祿大夫加金章紫綬茂度內足於財自絕人事經始本縣之華山爲居止優游野澤如此者七年十八年除會稽太守素有吏能職事甚理卒於官謚曰恭子子演位太子中舍人演四弟鏡永辯岱俱知名時謂之張氏五龍鏡少與光祿大夫顏延之鄰居顏談義飲酒喧呼不絕而鏡靜默無言聲後鏡與客談延之從籬邊聞之取胡牀坐聽辭義清玄延之心服謂客曰彼有人焉由是不復酣叫仕至新安太守演鏡兄弟中名最高餘不及初裕曾祖澄當葬父郭璞爲占墓地曰葬某處年過百歲位至三司而子孫不蕃某處年幾減半位裁卿校而累世貴顯澄乃葬其劣處位光祿年六十四而亡其子孫蕃昌云

永字景雲初爲郡主簿累遷尚書中兵郎先是尚書中條制繁雜元嘉十八年欲加脩撰徙永爲刪定郎掌其任二十二年除建康

令所居皆有稱績又除廣陵王誕北中郎錄事參軍永涉獵書史能爲文章善隸書騎射雜藝觸類兼善又有巧思益爲文帝所知紙墨皆自營造上每得永表啓輒執玩咨嗟自嘆供御者了不及也二十三年造華林園玄武湖並使永監統凡所制置皆受則於永永既有才能每盡心力文帝謂堪爲將二十九年以永爲揚威將軍與州刺史加都督王玄謨申坦等諸將經略河南進攻碣磔累旬不拔爲魏軍所殺甚衆永卽夜撤圍退軍不報告諸將衆軍驚擾爲魏所乘死敗塗地永及申坦並爲統府撫軍將軍蕭思話所收繫於歷城獄文帝以屢征無功諸將不可任詔責永等與思話又與江夏王義恭書曰早知諸將輩如此恨不以白刃驅之今者悔何所及三十年元凶弒立起永爲青州刺史及司空南譙王義宣起義又改永爲與州刺史加都督永遣司馬崔勲之中兵參

軍劉宣則二軍馳赴國難時蕭思話在彭城義宣慮二人不相諧  
緝與思話書勸與永坦懷又使永從兄長史張暢與永書勗之使  
遠慕廉藺在公之德近効平勃亡私之美事平召爲江夏王義恭  
大司馬從事中郎領中兵孝武孝建元年臧質反遣永輔武昌王  
渾鎮京口大明三年累遷廷尉上謂曰卿旣與釋之同姓欲使天  
下復無冤人永曉音律太極殿前鍾聲嘶孝武嘗以問永永荅鍾  
有銅滓乃扣鍾求其處鑿而去之聲遂清越明帝卽位爲青輿二  
州刺史監四州諸軍事統諸將討徐州刺史薛安都累戰尅捷破  
薛索兒又遷鎮軍將軍尋爲南兖州刺史加都督時薛安都據彭  
城請降而誠心不款明帝遣永與沈攸之重兵迎之加都督前鋒  
諸軍事進軍彭城安都招引魏兵旣至永狼狽引軍還爲魏軍追  
大敗復遇寒雪士卒離散永腳指斷落僅以身免失其第四子三

年徙會稽太守加都督將軍如故以北行失律固求自貶降號左  
將軍永痛悼所失之子有兼常哀服制雖除猶立靈坐飲食衣服  
待之如生每出行常別具名車好馬號曰待從有軍事輒語左右  
報郎君知也以破薛索兒功封孝昌縣侯在會稽賓客有謝方童  
阮須何達之等竊其權達貨盈積方童等坐贓下獄死永又降號冠  
軍將軍廢帝卽位爲右光祿大夫侍中領安成王師出爲吳郡太  
守元徽二年爲征北將軍南兖州刺史加都督永少便驅馳志在  
宣力其爲將帥能與士卒同甘苦朝廷所給賜脯餼必基坐齊割  
手自頒賜年雖已老志氣未衰優游閑任意甚不樂及有此授喜  
悅非常卽日命駕還都未之鎮遇桂陽王休範作亂永率所領屯  
白下休範至新亭前鋒攻南掖門永遣人覘賊旣反唱言臺城陷  
永衆潰棄軍還以舊臣不加罪止免官削爵以愧發病卒

岱字景山州辟從事累遷東遷令時殷冲爲吳興太守謂人曰張東遷親貧須養所以棲遲下邑然名器方顯終當大至後爲司徒左西曹掾母年八十籍注未滿岱便去官從實還養有司以岱違制將欲糾舉宋孝武曰觀過可以知仁不須案也累遷山陰令職事閑理巴陵王休若爲北徐州未親政事以岱爲冠軍諮議參軍領彭城太守行府州國事後臨海王爲征虜將軍廣州豫章王爲車騎揚州晉安王爲征虜南兖州岱歷爲三府諮議三王行事與典籤主帥共事事舉而得或謂岱曰主王旣幼執事多門而每能緝和公私云何致此岱曰古人言一心可以事百君我爲政端平待物以禮悔吝之事無由而及明闇短長更是才用多少耳入爲黃門郎新安王子鸞以盛寵爲南徐州割吳郡屬焉高選佐史孝武召岱謂曰卿美効夙著兼資宦已多今欲用卿爲子鸞別駕

總刺史之任無謂小屈終當大申也帝崩累遷吏部郎泰始末爲吳興太守元徽中爲益州刺史加都督數年益土安其政累遷吏部尚書王儉爲吏部郎時專斷曹事岱每相違執及儉爲宰相以此頗不相善兄子環弟恕誅吳郡太守劉遐齊高帝欲以恕爲晉陵郡岱曰恕未閑從政美錦不宜濫裁高帝曰恕爲人我所悉其又與環同勳自應有賞岱曰若以家貧賜祿此所不論語功推事臣門之恥加散騎常侍建元元年中詔序朝臣欲以右僕射擬岱褚彥回謂得此過優若別有忠誠特宜升引者別是一理詔更量出爲吳郡太守高帝知岱歷任清直至郡未幾手敕曰大郡任重乃未欲回換但總戎務殷宜須望實今用卿爲護軍加給事中岱拜竟詔以家爲府武帝卽位復爲吳興太守岱晚節在吳興更以寬恕著名遷南兖州刺史未拜卒岱初作遺命分張家財封置箱

中家業張減隨復改易如此十數年謚曰貞子

緒字思曼岱兄子也父演宋太子中舍人緒少知名清簡寡欲從伯敷及叔父鏡從叔暢並貴異之鏡比之樂廣敷云是我輩人暢言於孝武帝用爲尚書倉部郎都令史諮詳郡縣米事緒蕭然直視不以經懷宋明帝每見緒輒歎其清淡轉太子中庶子本州大中正遷司徒左長史吏部尚書袁粲言於帝曰臣觀張緒有正始遺風宜爲官職復轉中庶子後爲侍中遷吏部郎參掌大選元徽初東宮官罷選曹擬舍人王儉爲格外記室緒以儉人地兼美宜轉祕書丞從之緒又遷侍中嘗私謂客曰一生不解作諾有以告袁粲褚彥回者由是出爲吳郡太守緒初不知也昇明二年自祠部尚書爲齊高帝太傅長史建元元年爲中書令緒善談玄淡見敬異僕射王儉嘗云緒過江所未有北士可求之耳不知陳仲

弓黃叔度能過之不駕幸莊嚴寺聽僧達道人講維摩坐遠不聞緒言上難移緒乃遷僧達以近之時帝欲用緒爲右僕射以問王儉儉曰緒少有清望誠美選也南士由來少居此職褚彥回曰儉少年或未憶耳江左用陸玩顧和皆南人也儉曰晉氏衰政不可爲則先是緒諸子皆輕俠中子充少時又不護細行儉又以爲言乃止及立國學以緒爲太常卿領國子祭酒以王延之代緒爲中書令何點歎曰晉以子敬季琰爲此職今以王延之張緒爲之可謂清官後接之者實爲未易緒長於周易言精理與見宗一時常云何平叔不解易中七事武帝卽位轉吏部尚書祭酒如故永明二年領南郡王師加給事中三年轉太子詹事師給事如故緒每朝見武帝目送之謂王儉曰緒以位尊我我以德貴緒遷散騎常侍金紫光祿大夫師如故給親信二十人復領中正長沙王冕屬

選用吳郡聞人邕爲州議曹緒以資籍不當執不許是遺書於緒固請之緒正色謂是信曰此是身家州鄉殿下何得見逼乃止緒吐納風流聽者皆忘饑疲見者肅然如在宗廟雖終日與居莫能測焉劉悛之爲益州獻蜀柳數株枝條甚長狀若絲縷時舊宮芳林苑始成武帝以植於太昌靈和殿前常賞玩咨嗟曰此楊柳風流可愛似張緒當年時其見賞愛如此王儉爲尚書令丹陽尹時諸令史來問訊有一令史善俯仰進止可觀儉賞異之問曰經與誰共事荅云十餘歲在張令門下儉目送之時尹丞殷存至在坐曰是康成門人也七年竟陵王子良領國子祭酒武帝敕王晏曰吾欲令司徒辭祭酒以授張緒物議以爲如何子良竟不拜以緒領國子祭酒緒口不言利有財輒散之清談端坐或竟日無食門生見緒饑爲之辦飧然未嘗求也死之日無宅以殯遺命凶事不

設柳翼上以蘆葭轎車引柩靈上置盃水香火不設祭從弟融敬緒事之如親兄齋酒於緒靈前酌飲慟哭曰阿兄風流頓盡追贈散騎常侍特進光祿大夫謚簡子子完宋後廢帝時爲正員郎險行見寵坐廢錮完弟允永明中安西功曹淫通殺人伏法允兄充知名

充字延符少好逸遊緒嘗告歸至吳始入西郭逢充獵右臂鷹左牽狗遇緒船至便放緹脫鞵拜於水次緒曰一身兩役無乃勞乎充跪曰充聞三十而立今充二十九矣請至來歲緒曰過而能改顏氏子有焉及明年便脩改多所該通尤明老易能清言與從叔稷俱有令譽歷尚書殿中郎武陵王友時尚書令王儉當朝用事齊武帝皆取決焉儉方聚親賓充縠巾葛帔至便求酒言論放逸一坐盡傾及聞武帝欲以緒爲尚書僕射儉執不可充以爲愠與

儉書曰頃日路長霖霞韜晦涼暑未平想無虧攝充幸以漁釣之閑鎌採之暇時復引軸以自娛逍遙乎前史從橫萬古動默之路多端紛綸百年升降之塗不一故金剛水柔性之別也圓行方止器之異也善御性者不違金水之質善爲器者不易方圓之用充生平少長偶不以利欲干懷三十六年差得以棲貧自澹介然之志峭聳霜崖確乎之情峰橫海岬至如影纓天閣旣謝廊廟之華綴組雲臺終愧衣冠之秀寔由氣岬疎凝情塗狷隔獨師懷抱不見許於俗人孤秀神崖每遭回於在世長群魚鳥畢景松阿雖復玉沒於訪珪之辰桂掩於搜芳之日汎濫於漁父之時偃息於卜居之會如此而已充何識哉若夫驚巖罩日吐海逢天竦石崩尋分危落仞桂蘭綺靡叢雜於山幽松栢陰森相繚於澗側元卿於是乎不歸伯休亦以茲長往至於飛竿釣渚濯足滄洲獨浪煙霞

高臥風月悠悠琴酒岫遠誰來灼灼文言空擬方寸不覺鬱然千里路隔江川每至西風何嘗不歎文人歲路未強學優而仕道佐蒼生功橫海望可謂德盛當時孤松獨秀者也而茂陵之彥望冠蓋而長懷渭川之疇佇簪裾而竦歎得無惜乎充岷西百姓岱表一人蠶而衣耕而食不能事王侯覓知己造時人騁游說容與於屠博之間其權甚矣然舉世皆謂充爲狂充亦何能與諸君道之哉是以披聞見掃心胸述平生論語默所可通夢交魂推襟送抱者唯丈人而已闕廷負阻書罷莫因儻遇樵夫妄塵執事儉以爲脫略弗之重仍以書示緒緒杖之一百又爲御史中丞到撫所奏免官禁錮沈約見其書歎曰充始爲之敗終爲之成久之爲司徒諮議參軍與琅邪王思遠同郡陸惠曉等並爲司徒竟陵王賓客累遷義興太守爲政清淨吏人便之後爲侍中梁武帝兵至建鄴



東昏逢殺百官集西鍾下召充充不至武帝霸府建以充爲大司馬諮議參軍天監初歷太常卿吏部尚書居選以平允稱再遷散騎常侍國子祭酒登堂講說皇太子以下皆至時王侯多在學執經以拜充朝服而立不敢當再遷尚書僕射頃之出爲吳郡太守下車恤貧老故舊莫不忻悅卒於吳郡謚曰穆子子最嗣

瓌字祖逸宋征北將軍南兖州刺史永之子也仕宋累遷桂陽內史不欲前兄瑋處祿自免不拜後爲司徒右長史通直散騎常侍驍騎將軍初瓌父永拒桂陽王休範於白下敗績阮佃夫等欲加罪齊高帝固申明之瓌由此感恩自結後遭父母喪還吳持服昇明元年劉彥節有異圖弟遐爲吳郡潛相影響高帝密遣殿中將軍卞白龍令瓌取遐諸張世有豪氣瓌宅中常有父時舊部曲數百遐召瓌委以軍事瓌僞受命與叔恕領兵十八人入郡斬之郡

內莫敢動事捷高帝以告左軍張沖沖曰瓌以百口一擲出手得盧矣卽授吳郡太守錫以嘉名封義城縣侯從弟融聞之與瓌書曰吳郡何晚何須王反聞之嗟驚乃是阿兄郡人顧嵩陸閑並少年未知名瓌並引爲綱紀後並立名世以爲知人齊建元元年改封平都侯遷侍中與侍中沈文季俱在門下高帝常謂曰卿雖我臣我親卿不異曠疑等文季每還直器物若遷瓌止朝服而已時集書每兼門下東省實多清貧有不識瓌者常呼爲散騎出爲吳興太守瓌以既有國秩不取郡奉高帝敕上庫別藏其奉以表其清武帝卽位爲寧蠻校尉雍州刺史加都督徵拜左戶尚書加右軍將軍還後安陸王綽臨雍州行部登蔓山有野老來乞綽問何不事產而行乞邪荅曰張使君臨州理物百姓家得相保後人政嚴故至行乞綽由是深加嗟賞後拜太常自謂閑職輒歸家武帝

曰卿輩未富貴謂人不與既富貴那復欲委去瓌曰陛下御臣等若養馬無事就閑廐有事復牽來帝猶怒遂以爲散騎常侍光祿大夫鬱林之廢朝臣到宮門參承明帝瓌託脚疾不至海陵立明帝疑外藩起兵以瓌鎮石頭督衆軍事瓌見朝廷多難遂恒臥疾建武末屢啓求還吳見許居室豪富伎妾盈房或有譏其衰暮畜伎瓌曰我少好音律老而方解平生嗜欲無復一存唯未能遣此耳明帝疾甚防疑大司馬王敬則授瓌平東將軍吳郡太守以爲之備及敬則反瓌遣兵迎拒於松江聞敬則軍鼓聲一時散走瓌棄郡逃人間事平乃還郡爲有司奏免官削爵永元初爲光祿大夫三年梁武帝起兵東昏假瓌節戍石頭尋棄城還宮梁天監元年拜給事中右光祿大夫以脚疾拜於家四年卒瓌有子十二人常子中應有好者子率知名

率字士簡性寬雅十二能屬文常日限爲詩一篇或數日不作則追補之稍進作賦頌至年十六向作二千餘首有虞訥者見而詆之率乃一旦焚毀更爲詩示焉託云沈約訥便句句嗟稱無字不善率曰此吾作也訥慙而退時陸少玄家有父澄書萬餘卷率與少玄善遂通書籍盡讀其書建武三年舉秀才除太子舍人與同郡陸倕陸厥幼相友狎嘗同載詣左衛將軍沈約遇任昉在焉約謂昉曰此二子後進才秀皆南金也卿可識之由此與昉友梁天監中爲司徒謝朓掾直文德待詔省敕使抄乙部書又使撰古婦人事使工書人琅邪王琛吳郡范懷約等寫給後宮率取假東歸論者謂爲傲世率懼乃爲待詔賦奏之甚見稱賞手敕荅曰相如工而不敏枚臯速而不工卿可謂兼二子於金馬矣又侍宴賦詩武帝別賜率詩曰東南有才子故能服官政余雖慙古昔得人今

爲盛率奏詩往反六首後引見於玉衡殿謂曰卿東南物望朕宿昔所聞卿言宰相是何人不從天下不由地出卿名家奇才若復以禮律爲意便是其人祕書丞天下清官東南望胄未有爲之者今以相處爲卿定名譽尋以爲祕書丞掌集書詔策四年禊飲華光殿其日河南國獻赤龍駒能拜伏善舞詔率與到漑周興嗣爲賦武帝以率及興嗣爲工其年父憂去職有父時妓數十人其善謳者有色貌邑子儀曹郎顧琬之求婢謳者不願遂出家爲尼嘗因齋會率宅琬之乃飛書言與率姦南司以事奏聞武帝惜其才寢其奏然猶致時論服闋久之不仕七年除中權建安王中記室參軍俄直壽光省修丙丁部書抄累遷晉安王宣惠諮議參軍率在府十年恩禮甚篤後爲揚州別駕率雖歷居職務未常留心簿領及爲別駕奏事武帝覽牒問之並無對但答云事在牒中帝不

悅後歷黃門侍郎出爲新安太守丁所生母憂卒率嗜酒不事於家務尤忘懷在新安遣家僮載米三千石還宅及至遂耗太半率問其故荅曰雀鼠耗率笑而言曰壯哉雀鼠竟不研問自少屬文七略及藝文志所載詩賦今亡其文者並補作之所著文衡十五卷文集四十卷行於世子長公率弟盾

盾字士宣以謹重稱爲無錫令遇劫問劫何須劫以刀斫其頰眉目咄咄不易餘無所言於是生資皆盡不以介懷爲湘東王記室出監富陽令廓然獨處無所用心身死之日家無遺財唯有文集并書千餘卷酒米數甕而已

稷字公喬環弟也幼有孝性所生母劉無寵遘疾時稷年十一侍養衣不解帶每劇則累夜不寢及終毀瘠過人杖而後起見年輩幼童輒哽咽泣淚州里謂之淳孝長兄瑋善彈箏稷以劉氏先執

此伎聞瑋爲清調便悲感頓絕遂終身不聽之性疎率朗悟有才略起家著作佐郎不拜父永及嫡母丘相繼歿六年廬于墓側齊永明中爲豫章王疑主簿與彭城劉繪俱見禮接未嘗被呼名每呼爲劉四張五以貧求爲剡令略不視事多爲小山遊會山賊唐寓之作亂稷率厲部人保全縣境所生母劉先假葬琅邪黃山建武中改申葬禮賻助委積於時雖不拒絕事畢隨以還之自幼及長數十年中常設劉氏神坐出告反面如事生焉歷給事中黃門侍郎新興永寧二郡太守郡犯私諱改永寧爲長寧永元末爲侍中宿衛宮城梁武師至兼衛尉江淹出奔稷兼衛尉卿副王瑩都督城內諸軍事時東昏淫虐北徐州刺史王珍國就稷謀乃使直閣張齊行弒于含德殿稷乃召右僕射王亮等列坐殿前西鍾下議遣國子博士范雲中書舍人裴長穆等使石頭城詣武帝以稷

爲侍中左衛將軍遷大司馬左司馬梁朝建爲散騎常侍中書令及上卽位封江安縣子位領軍將軍武帝常於樂壽殿內宴稷醉後言多怨辭形於色帝時亦酣謂曰卿兄殺郡守弟殺其君袖提帝首衣染天血如卿兄弟有何名稱稷曰臣乃無名稱至於陛下不得言無勲東昏暴虐義師亦來伐之豈在臣而已帝捋其鬚曰張公可畏人中丞陸杲彈稷云領軍張稷門無忠貞官必險達殺君害主業以爲常武帝留中竟不問累遷尚書左僕射帝將幸稷宅以盛暑留幸僕射省舊臨幸供具皆酬太官饌直帝以稷清貧手詔不受宋時武帝經造張永至稷三世並降萬乘論者榮之稷雖居朝右每慙口實乃名其子伊字懷尹霍字希光峻字農人同字不見見字不同以旌其志旣懼且恨乃求出許之出爲青冀二州刺史不得志常閉閣讀佛經禁防寬弛僚吏頗致侵擾州人徐

道角等夜襲州城乃害之有司奏削爵土稷性明烈善與人交歷官無畜聚奉祿皆頒之親故家無餘財爲吳興太守下車存問遺老引其子孫置之右職政稱寬恕初去郡就僕射徵道由吳鄉人候稷者滿水陸稷單裝徑還都下人莫之識其率素如此稷長女楚媛適會稽孔氏無子歸宗至逢稷見害女以身蔽刃先父卒稷與族兄充融卷俱知名時目云充融卷稷爲四張卷字令遠少以和理著稱能清言位都官尚書天監初卒稷子岷

岷字四山稷初爲剡令至岷亭生之因名岷字四山少敦孝行年三十餘猶班衣受稷杖動至數百收淚歡然方雅有志操能清言感家禍終身蔬食布衣手不執刀刃不聽音樂弟淮言氣不倫岷垂泣訓誘起家祕書郎累遷鎮南湘東王長史尋陽太守王暉曰玄言因爲之筮得節卦謂岷曰卿後當東入爲郡恐不得終其天

年岷曰貴得其所耳時伏挺在坐曰君王可畏人也還爲太府卿吳興太守侯景圍建鄴遣弟伊率郡兵赴援城陷御史中丞沈浚違難東歸岷往見之謂曰賊臣憑陵人臣効命之日今欲收集兵刃保據貴鄉雖復萬死誠亦無恨浚固勸岷舉義時邵陵王倫東奔至錢唐聞之遣前舍人陸丘公板授岷征東將軍岷曰天子蒙塵今日何情復受榮號留板而已賊行臺劉神茂攻破義興遣使說岷斬其使仍遣軍破神茂侯景乃遣其中軍侯子鑒助神茂擊岷軍敗乃釋戎服坐於聽事賊臨以刃終不屈執以送景景將舍之岷曰速死爲幸乃殺之子弟遇害者十餘人景欲存其一子岷曰吾一門已在鬼錄不就爾處求恩於是皆死賊平元帝追贈侍中中衛將軍開府儀同三司謚忠貞子岷弟暉知名種字士苗永從孫也祖辯宋大司農廣州刺史父略太子中庶子

臨海太守種少恬靜居處雅正傍無造請時人語曰宋稱敷演梁則卷充清虛學尚種有其風仕梁爲中軍宣城王府主簿時已四十餘家貧求爲始豐令及武陵王紀爲益州刺史重選府僚以種爲左西曹掾種辭以母老爲有司奏坐黜免侯景之亂奉母東奔鄉里母卒種時年五十而毀瘠過甚又迫以凶荒未葬服雖畢居家飲食恒若在喪景平初司徒王僧辯以狀奏起爲中從事并爲具葬禮葬訖種方卽吉僧辯又以種年老無子賜以妾及居處之具陳武帝受禪爲太常卿歷位左戶尚書侍中中書令金紫光祿大夫種沈深虛靜識量宏博時以爲宰相之器僕射徐陵常抗表讓位於種以爲宜居左執其爲所推如此卒贈特進謚元子種仁恕寡欲雖歷顯位家產屢空終日晏然不以爲病太建初女爲始興王妃以居處僻陋特賜宅一區又累賜無錫嘉興縣秩常於無

錫見重囚在獄天寒呼囚暴日遂失之帝大笑而不深責有集十四卷稜亦清靜有識度位司徒左長史贈光祿大夫論曰張裕有宋之初早參霸政出內所歷莫非清顯諸子並荷崇構克舉家聲其美譽所歸豈徒然也思曼立身簡素殆人望乎夫濯纓從事理存無二取信一主義絕百心以永元之末人憂塗炭公喬重圍之內首創大謀而旋見猜嫌又况異於斯也然則士之行已可無深議四山赴蹈之方可謂矯其違矣

南史卷三十二

列傳第二十二

張邵

子敷

孫冲

兄子湯

寶積

徐文伯

嗣伯

暢子融

張邵字茂宗會稽太守裕之弟也初為晉琅邪內史王誕龍驤府功曹桓玄徙於廣州親故皆離棄之唯邵情禮彌謹流涕追送時寇亂年饑邵又資饋其妻子桓玄篡位父敞先為尚書以答事微謬降為廷尉卿及宋武帝討桓玄邵白敞表獻忠款帝大悅命署寺門曰有犯張廷尉家者軍法論事平以敞為吳郡太守及王謐為揚州召邵補主簿劉毅位居亞相好士愛才當世莫不輻輳唯邵不往親故怪而問之邵曰主公命世人傑何煩多問劉穆之言於帝帝益親之轉太尉參軍署長流賊曹盧循至蔡洲武帝至石頭使邵守南城時百姓水際望賊帝不解其意以問邵邵曰節鉞

張邵字茂宗

未反奔散之不暇亦何暇觀望今當無復恐耳帝以邵勤練憂公重補州主簿邵悉心政事精力絕人及誅劉藩邵時在西州直廬卽夜誡衆曹曰大軍當大討可各各條倉庫及舟船人領至曉取辦旦日帝求諸簿最應時卽至怪問其速諸曹荅曰宿受張主簿處分帝曰張邵可謂同人憂慮矣九年世子始開征虜府以邵補錄事參軍轉號中軍遷諮議參軍領記室十二年武帝北伐邵請見曰人生危脆宜有遠慮若劉穆之邂逅不幸誰可代之尊業如此若有不諱則處分云何帝曰此自委穆之與卿耳青州刺史檀祗鎮廣陵輒率衆至滁中掩討亡命劉穆之慮其爲變議欲遣軍邵曰檀韶據中流道濟爲軍首若有相疑之跡則大府立危不如逆遣慰勞必無患也祗果不動及穆之暴卒朝廷恒懼便發詔以司馬徐羨之代邵獨曰今誠急病任終在徐然世子無專行之義

宜須諮信反方便世子出命曰朝廷及大府事悉諮徐司馬其餘啓還武帝善其臨事不撓得大臣節十四年世子改授荊州邵諫曰儲貳之重四海所繫不宜外出敢以死請世子竟不行文帝爲中郎將荊州刺史以邵爲司馬領南郡相衆事悉決於邵武帝受命以佐命功封臨沮伯分荊州立湘州以邵爲刺史將署府邵以長沙內地非用武之國置府妨人乖爲政要從之荊州刺史謝晦反遺書要邵邵不發函使呈文帝元嘉五年轉征虜將軍領寧蠻校尉雍州刺史加都督初王華與邵不和及華參要親舊爲之危心邵曰子陵方弘至公豈以私隙害正義是任也華實舉之及至襄陽築長圍修立堤堰創田數千頃公私充給丹浙二州蠻屬爲寇邵誘其帥並出因大會誅之遣軍掩其村落悉禽旣失信群蠻所在並起水陸路斷七年子敷至襄陽定省當還都羣蠻欲斷取



之會蠕蠕國獻使下蠻以爲是敷因掠之邵坐降號揚烈將軍江夏王義恭鎮江陵以邵爲撫軍長史持節南蠻校尉九年坐在雍州營私畜取賊貨二百四十五萬下廷尉免官削爵土後爲吳興太守卒追復爵邑謚曰簡伯邵臨終遺命祭以菜果葦席爲輜車諸子從焉長子敷

敷字景胤生而母亡年數歲問知之雖童蒙便有感慕之色至十歲許求母遺物而散施已盡唯得一扇乃緘錄之每至感恩輒開笥流涕見從母悲感哽咽性整貴風韻甚高好讀玄言兼屬文論初父邵使與高士南陽宗少文談繫象往復數番少文每欲屈握麈尾歎曰吾道東矣於是名價日重宋武帝聞其美召見奇之曰真千里駒也以爲世子中軍參軍敷見接引累遷江夏王義恭撫軍記室參軍義恭就文帝求一學義沙門會敷赴假還江陵入辭

文帝令以後車載沙門往謂曰道中可得言晤敷不奉詔曰臣性不耐雜上甚不悅遷正員中書郎敷小名檀父邵小名梨文帝戲之曰檀何如梨荅曰梨是百果之宗檀何敢比也中書舍人狄當周赧並管要務與敷同省名家欲詣之赧曰彼若不相容接便不如勿往詎可輕行當日一作吾等並已員外郎矣何憂不得共坐敷先旁設二牀去壁三四尺二客就席敷呼左右曰移我遠客赧等失色而去其自寵遇如此善持音儀盡詳緩之致與人別執手曰念相聞餘響久之不絕張氏後進皆慕之其源起自敷也遷黃門侍郎始興王濬後將軍司徒左長史未拜父在吳興亡成服凡十餘日始進水漿塋畢不進鹽菜遂毀瘠成疾伯父茂度每止譬之輒更感慟絕而復續茂度曰我異譬汝有益但更甚耳自是不復往未暮而卒孝武卽位詔旌其孝道追贈侍中改其所居稱孝張

里敷弟東襲父封位通直郎東勇力手格猛獸元凶以爲輔國將軍孝武至新亭東出奔墜淮而死子式嗣弟冲

冲字思約出繼伯父敷冲母戴顯女有儀範張氏內取則焉冲少有志性隨從叔永爲將帥除盱眙太守永征彭城遇寒軍人足脛凍斷者十七八冲足指皆墮齊永明八年爲假節監青冀二州行刺史事冲父初卒遣命祭我必以鄉土所產無用牲物冲在鎮四時還吳國取果菜每至烝嘗輒流涕薦焉仍轉刺史永元二年爲南兗州刺史遷司州裴叔業以壽春降魏又遷冲南兗州刺史並未拜崔慧景事平徵建安王寶寅還都以冲爲舒州刺史一歲之中頻授四州刺史至是乃受任封定襄侯梁武帝起兵手書喻意又遣辯士說之冲確然不回東昏遣驍騎將軍薛元嗣制局監暨榮伯領兵及糧運送冲使拒西師元嗣等懲劉山陽之敗疑冲不敢

進倅住夏首浦聞梁武師將至元嗣榮伯相率入郢城時竟陵太守房僧寄被代還至郢東昏敕僧寄留守魯山除驍騎將軍僧寄謂冲曰下官雖未荷朝廷深恩實蒙先帝厚澤蔭其樹者不折其枝實欲微立塵効冲深相許諾共結盟誓分部拒守遣軍主孫樂祖數千人助僧寄援魯山岸立城壘明年二月梁武圍魯山城遣軍主曹景宗等過江攻郢城中兵參軍陳光靜等間出擊之光靜戰死冲固守不出病將死厲府僚以誠節言終而卒元嗣榮伯與冲子孜及長史江夏程茂固守東昏詔贈冲散騎常侍護軍將軍元嗣等處圍城之中無他經略唯迎蔣子文及蘇侯神日禺中於州聽上祀以求福鈴鐸聲晝夜不止又使子文導從登陴巡行旦日輒復如之識者知其將亡僧寄病死孫樂祖窘以城降郢被圍二百餘日士庶病死者七八百家魯山陷後二日程茂及元嗣

等議降使攷爲書與梁武帝冲故吏青州中從事房長瑜謂攷曰  
前使君忠貫昊天操愈松竹郎君但當端坐畫一以荷析薪若天  
運不與幅巾待命以下從使君今若隨諸人之計非唯郢州士女  
失高山之望亦恐彼所不取也不從卒以郢城降時以冲及房僧  
寄比臧洪之被圍也贈僧寄益州刺史

暢字少微邵兄禕子也禕少有操行爲晉琅邪王國郎中令從王  
至洛還京都宋武帝封藥酒一罌付禕使密加酖毒受命於道自  
飲而卒暢少與從兄敷演鏡齊名爲後進之秀起家爲太守徐佩  
之主簿佩之被誅暢馳出奔赴制服盡哀爲論者所美弟牧嘗爲  
獒犬所傷醫云宜食蝦蟇牧甚難之暢含笑先嘗牧因此乃食創  
亦卽愈累遷太子中庶子孝武鎮彭城暢爲安北長史沛郡太守  
元嘉二十七年魏太武南征太尉江夏王義恭統諸軍出鎮彭城

太武親率大衆去彭城數十里彭城衆力雖多軍食不足義恭欲  
棄彭城南歸計議彌日不定時歷城衆少食多安北中兵參軍沈  
慶之議欲以車營爲函箱陳精兵爲外翼奉二王及妃媛直趨歷  
城分城兵配護軍將軍蕭思話留守太尉長史何勗不同欲席卷  
奔鬱洲自海道還都二議未決更集羣僚謀之暢曰若歷城鬱洲  
有可至之理下官敢不高讚今城內乏食百姓咸有走情但以關  
扃嚴固欲去莫從耳若一旦動脚則各自散走欲至所在何由可  
得今軍食雖寡朝夕猶未窘罄豈有捨萬安之術而就危亡之道  
若此計必用下官請以頸血汚君馬跡孝武聞暢議謂義恭曰張  
長史言不可異也義恭乃止魏太武得至仍登城南亞父冢於戲  
馬臺立氊屋先是隊主蒯應見執其日晡時太武遣送應至小市  
門致意求甘蔗及酒孝武遣人送酒二器甘蔗百挺求駱駝明日

太武又自上戲馬臺復遣使至小市門求與孝武相見遣送駱駝并致雜物使於南門受之暢於城上與魏尚書李孝伯語孝伯問君何姓荅云姓張孝伯曰張長史暢曰君何得見識孝伯曰君聲名遠聞足使我知因言說久之城內有具思者嘗在魏義恭遣視知是孝伯乃開門進餉物太武又求酒及甘橘暢宣孝武旨又致螺盃雜粽南土所珍太武復令孝伯傳語曰魏主有詔借博具暢曰博具當為申致有詔之言政可施於彼國何得稱之於此孝伯曰鄰國之君何為不稱詔於鄰國之臣暢曰君之此稱尚不可聞於中華况在諸王之貴而獨曰鄰國之君邪孝伯曰魏主言太尉鎮軍久闕南信殊當憂邑若欲遣信當為護送暢曰此方間路甚多不復以此勞魏主孝伯曰亦知有水路似為白賊所斷暢曰君著白衣故稱白賊邪孝伯大笑曰今之白賊亦不異黃巾赤眉暢

曰黃巾赤眉似不在江南孝伯曰亦不離青徐暢曰今者青徐實為有賊但非白賊耳又求博具俄送與太武又遣送氈及九種鹽并胡豉云此諸鹽各有所宜白鹽是魏主所食黑者療腹脹氣滿細刮取六銖以酒服之胡鹽療目痛柔鹽不用食療馬脊創赤鹽駁鹽臭鹽馬齒鹽四種並不中食胡豉亦中噉又求黃甘并云魏主致意太尉安北何不遣人來至我間彼此之情雖不可盡要須見我小大知我老少觀我為人若諸佐不可遣亦可使僮來暢又宣旨荅曰魏主形狀才力久為來往所具李尚書親自銜命不患彼此不盡故不復遣信又云魏主恨向所送馬殊不稱意安北若須大馬當更送之脫須蜀馬亦有佳者暢曰安北不乏良駟送自彼意非此所求義恭又餉炬燭一作千挺孝武亦致錦一匹又曰知更須黃甘誠非所吝但會不足周彼一軍向給魏主未應便乏故不

復重付太武復求甘蔗安石榴暢曰石榴出自鄴下亦當非彼所  
乏孝伯曰君南土膏梁何爲著屨君而著此使將士云何暢曰膏  
梁之言誠爲多愧但以不武受命統軍戎陣之間不容緩服太武  
又遣就二王借篳篥琵琶箏笛等器及棊子孝伯辭辯亦北土之  
美暢隨宜應答吐屬如流音韻詳雅風儀華潤孝伯及左右人並  
相視歎息時魏聲云當出襄陽故以暢爲南譙王義宣司空長史  
南郡太守三十年元凶弒逆義宣發哀之日卽便舉兵暢爲元佐  
位居僚首哀容俯仰陰映當時舉哀畢改服著黃袴褶出射堂簡  
人音姿容止莫不矚目見者皆願爲盡命事平徵爲吏部尚書封  
夷道縣侯義宣既有異圖蔡超等以暢人望勸義宣留之乃解南  
蠻校尉以授暢加冠軍將軍領丞相長史暢遣門生荀僧寶下都  
因顏竣陳義宣豐狀僧寶有私貨停巴陵不時下會義宣起兵津

路斷絕僧寶遂不得去義宣將爲逆遣嬖人翟靈寶告暢暢陳必  
無此理請以死保之靈寶知暢不回勸義宣殺以徇衆賴丞相司  
馬竺超人得免進號撫軍別立軍部以收人望暢雖署文檄而飲  
酒常醉不省文書隨義宣東下梁山戰敗於亂兵自歸爲軍人所  
掠衣服都盡遇右將軍王玄謨乘輿出營暢已得敗衣因排玄謨  
上輿玄謨意甚不悅諸將請殺之隊主張世營救得免執送都下  
廷尉尋見原起爲都官尚書轉侍中代子淹領太子右衛率孝武  
宴朝賢暢亦在坐何偃因醉曰張暢故是奇才同義宣作賊亦能  
無咎非才何以致此暢乃厲聲曰太初之時誰黃其閤帝曰何事  
相苦初元凶時偃父尚之爲元凶司空義師至新林門生皆逃尚  
之父子與婢妾共洗黃閤故暢譏之孝建二年出爲會稽太守卒  
謚曰宣暢愛弟子輯臨終遺命與輯合墳論者非之暢弟悅亦有

美稱歷侍中臨海王子項前軍長史南郡太守晉安王子勛建偽  
號召拜爲吏部尚書與鄧琬共輔僞政事敗悅殺琬歸降復爲太  
子中庶子後拜雍州刺史泰始六年明帝於巴郡置三巴校尉以  
悅補之加持節輔師將軍領巴郡太守未拜卒暢子浩官至義陽  
王昶征北諮議參軍浩弟淹黃門郎封廣晉縣子太子左衛率東  
陽太守逼郡吏燒臂照佛百姓有罪使禮佛贖愆動至數千拜坐  
免官禁錮起爲光祿勳臨川內史後與晉安王子勛同逆軍敗見  
殺淹弟融

融字思光弱冠有名道士同郡陸修靜以白鷺羽塵尾扇遺之曰  
此旣異物以奉異人解褐爲宋新安王子鸞行參軍王母殷淑儀  
薨後四月八日建齋并灌佛僚佐觀者多至一萬少不減五千融  
獨注觀百錢帝不悅曰融殊貧當序以佳祿出爲封溪令從叔永

出後渚送之曰似聞朝旨汝尋當還融曰不患不還政恐還而復  
去及行路經嶂嶮獠賊執融將殺食之融神色不動方作洛生詠  
賊異之而不害也浮海至交州於海中遇風終無懼色方詠曰乾  
魚自可還其本鄉肉脯復何爲者哉又作海賦文辭詭激獨與衆  
異後以示鎮軍將軍顧覲之覲之曰卿此賦實超玄虛但恨不道  
鹽耳融卽求筆注曰漉沙構白熬波出素積雪中春飛霜暑路此  
四句後所足也覲與融兄有恩好覲卒融身負墳土在南與交趾  
太守卞展善展於嶺南爲人所殺融挺身奔赴舉秀才對策中第  
爲尚書殿中郎不就改爲儀曹郎尋請假奔叔父喪道中罰幹錢  
敬道鞭杖五十寄繫延陵獄大明五年制二品清官行僮幹杖不  
得出十爲左丞孫緬所奏免官復位攝祠部倉部二曹時領軍劉  
劭戰死融以祠部議上應哭劭見從又俗人忌以正月開太倉融

南史三十一  
議不宜拘束小忌尋兼掌正厨見宰殺回車徑去自表解職再遷南陽王友融父暢爲丞相掌史義宣事難暢將爲王玄謨所殺時玄謨子瞻爲南陽王長史融啓求去官不許融家貧欲祿乃與從叔征北將軍永書曰融昔幼學早訓家風雖則不敏率以成性布衣韋帶弱年所安簞食瓢飲不覺不樂但世業清貧人生多待榛栗棗修女贄旣長束帛禽鳥男禮已大勉身就官十年七仕不欲代耕何至此事昔求三吳一丞雖屬舛錯今聞南康缺守願得爲之融不知階級階級亦可不知融政以求丞不得所以求郡求郡不得亦可復求丞又與吏部尚書王僧虔書曰融天地之逸人也進不辯貴退不知賤實以家貧累積孤寡傷心八姪俱孤二弟頓弱豈能山海陋祿申融情累阮籍愛東風融亦欣晉平閑外時議以融非御人才竟不果辟齊太傅掾稍遷中書郎非其所好

乞爲中散大夫不許張氏自敷以來並以理音辭修儀範爲事至融風止詭越坐常危膝行則曳步翹身仰首意制甚多見者驚異聚觀成市而融了無慙色隨例同行常稽遲不進高帝素愛融爲太尉時與融欵接見融常笑曰此人不可無一不可有二卽位後手詔賜融衣曰見卿衣服麤故誠乃素懷有本文爾藍縷亦虧朝望今送一通故衣意謂雖故乃勝新也是吾所著已令裁減稱卿之體并履一量高帝出太極殿西室融入問訊彌時方登階及就席上曰何乃遲爲對曰自地升天理不得速時魏主至淮而退帝問何意忽來忽去未有荅者融時下坐抗聲曰以無道而來見有道而去公卿咸以爲捷融善草書常自美其能帝曰卿書殊有骨力但恨無二王法荅曰非恨臣無二王法亦恨二王無臣法融假還鄉詣王儉別儉立此地舉袂不前融亦舉手呼儉曰歎曰王前

南史三十三  
九  
儉不得已趨就之融曰使融不爲慕勢而令君爲趨士豈不善乎  
常歎云不恨我不見古人所恨古人又不見我融與吏部尙書何  
戢善往詣戢誤通尙書劉澄下車入門乃曰非是至戶望澄又曰  
非是旣造席視澄曰都自非是乃去其爲異如此又爲長沙王鎮  
軍竟陵王征北諮議並領記室司徒從事中郎永明二年總明觀  
講敕朝臣集聽融扶入就榻私索酒飲之事畢乃長歎曰嗚呼仲  
尼獨何人哉爲御史中丞到擣所奏免官尋復職融形貌短醜精  
神清澈王敬則見融革帶寬殆將至髀謂曰革帶太急融曰旣非  
步吏急帶何爲融假東出武帝問融住在何處荅曰臣陸處無屋  
舟居無水後上問其從兄緒緒曰融近東出未有居止權牽小船  
於岸上住上大笑後使融接對北使李道固就席道固顧而言曰  
張融是宋彭城長史張暢子不融頓感久之曰先君不幸名達六

夷豫章王大會賓僚融食炙始行畢行炙人便去融欲求鹽蒜口  
終不言方搖食指半日乃息出入朝廷皆拭目驚觀之八年朝臣  
賀衆瑞公事融扶入拜起復爲有司所奏見原遷司徒兼右長史  
竟陵張欣時爲諸暨令坐罪當死欣時父興世討宋南譙王義宣  
官軍欲殺融父暢興世以袍覆暢而坐之以此得免興世卒融著  
高履爲負土成墳至是融啓竟陵王子良乞代欣時死子良荅曰  
此乃是長史美事恐朝有常典不得如長史所懷遷黃門郎太子  
中庶子司徒左長史融有孝義忌月三旬不聽樂事嫂甚謹父暢  
臨終謂諸子曰昔丞相事難吾以不同將見殺緣司馬竺超人得  
活爾等必報其子後超人孫微冬月遭母喪居貧融弔之悉脫衣  
以爲賻披牛被而反常以兄事微豫章王疑竟陵王子良薨自以  
身經佐吏哭輒盡慟建武四年病卒遺令建白旒無旒不設祭令



人捉麈尾登屋復魂曰吾生平所善自當凌雲一笑三千買棺無  
製新衾左手執孝經老子右手執小品法華經妾二人事哀畢各  
遣還家曰吾生平之風調何至使婦人行哭失聲不須暫停閨閣  
融玄義無師法而神解過人高談鮮能抗拒永明中遇疾爲問律  
自序云吾文章之體多爲世人所驚汝可師耳以心不可使耳爲  
心師也夫文豈有常體但以有體爲常政當有其體丈夫當刪詩  
書制禮樂何至因循寄人籬下臨卒又戒其子曰手澤存焉父書  
不讀况文音情婉在其韻吾意不然別遺爾旨吾文體英變變而  
屢奇豈吾天挺蓋不隕家聲汝可號哭而看之融文集數十卷行  
於世自名其集爲玉海司徒褚彥回問其故融云蓋玉以比德海  
崇上善耳張氏前有敷演鏡暢復有充融卷稷第六弟寶積建武  
中出爲廬陵太守時名流謝瀋何點陸惠曉孔珪至融弟鐵之舍

點造坐便曰今日可謂盛集二五我兄弟之流阿六張氏保家之  
子顧見王思遠曰卿詐作善非實得也二五謂孔珪及融並第五  
寶積永元中爲湘州行事蕭穎胄於江陵乘腰輿詣穎胄舉動自  
若穎胄問何至之晚荅曰本朝危亂四海橫流旣不能爲比干之  
死實未忍爲微子之去是以至晚穎胄深以爲善卽用爲相府諮  
議後位御史中丞融與東海徐文伯兄弟厚文伯字德秀濮陽太  
守熙曾孫也熙好黃老隱於秦望山有道士過求飲留一瓠齎與  
之曰君子孫宜以道術救世當得二千石熙開之乃扁鵲鏡經一  
卷因精心學之遂名震海內生子秋夫彌工其術仕至射陽令嘗  
夜有鬼呻聲甚悽慘秋夫問何須荅言姓某家在東陽患腰痛死  
雖爲鬼痛猶難忍請療之秋夫曰云何厝法鬼請爲芻人案孔穴  
鍼之秋夫如言爲灸四處又鍼肩井三處設祭埋之明日見一人

謝恩忽然不見當世伏其通靈秋夫生道度叔嚮皆能精其業道  
度有脚疾不能行宋文帝令乘小輿入殿爲諸皇子療疾無不絕  
驗位蘭陵太守宋文帝云天下有五絕而皆出錢唐謂杜道鞠彈  
碁范悅詩褚欣遠模書褚胤圍碁徐道度療疾也道度生文伯叔  
嚮生嗣伯文伯亦精其業兼有學行倜儻不屈意於公卿不以醫  
自業融謂文伯嗣伯曰昔王微嵇叔夜並學而不能殷仲堪之徒  
故所不論得之者由神明洞徹然後可至故非吾徒所及且褚侍  
中澄當貴亦能救人疾卿此更成不達荅曰唯達者知此可崇不  
達者多以爲深累既鄙之何能不恥之文伯爲効與嗣伯相埒宋  
孝武路太后病衆醫不識文伯診之曰此石博小腸耳乃爲水劑  
消石湯病卽愈除鄱陽王常侍遺以千金旬日恩意隆重宋明帝  
宮人患腰痛牽心每至輒氣欲絕衆醫以爲肉癥文伯曰此髮癥

以油投之卽吐得物如髮稍引之長三尺頭已成蛇能動挂門上  
適盡一髮而已病都差宋後廢帝出樂遊苑門逢一婦人有娠帝  
亦善診之曰此腹是女也問文伯曰腹有兩子一男一女男左邊  
青黑形小於女帝性急便欲使剖文伯惻然曰若刀斧恐其變異  
請針之立落便寫足太陰補手陽明胎便應針而落兩兒相續出  
如其言子雄亦傳家業尤工診察位奉朝請能清言多爲貴遊所  
善事母孝謹母終毀瘠幾至自滅俄而兄亡扶杖臨喪撫膺一慟  
遂以哀卒嗣伯字叔紹亦有孝行善清言位正員郎諸府佐彌爲  
臨川王映所重時直閣將軍房伯玉服五石散十許劑無益更患  
冷夏日常複衣嗣伯爲診之曰卿伏熱應須以水發之非冬月不  
可至十一月冰雪大盛令二人夾捉伯玉解衣坐石取冷水從頭  
澆之盡二十斛伯玉口噤氣絕家人啼哭請止嗣伯遣人執杖防

閣敢有諫者搗之又盡水百斛伯玉始能動而見背上彭彭有氣俄而起坐曰熱不可忍乞冷飲嗣伯以水與之一飲一升病都差自爾恆發熱冬月猶單禪衫體更肥壯常有嫗人患滯冷積年不差嗣伯爲診之曰此尸注也當取死人枕煮服之乃愈於是往古冢中取枕枕已一邊腐缺服之卽差後秣陵人張景年十五腹脹面黃衆醫不能療以問嗣伯嗣伯曰此石虵耳極難療當死人枕煮之依語煮枕以湯投之得大利并虵蟲頭堅如石五升病卽差後沈僧翼患眼痛又多見鬼物以問嗣伯嗣伯曰邪氣入肝可覓死人枕煮服之竟可埋枕於故處如其言又愈王晏問之曰三病不同而皆用死人枕而俱差何也荅曰尸注者鬼氣伏而未起故令人沈滯得死人枕投之魂氣飛越不得復附體故尸注可差石虵者久虵也醫療旣僻虵中轉堅世間藥不能遣所以須鬼物驅

之然後可散故令煮死人枕也夫邪氣入肝故使眼痛而見魍魎應須邪物以鈎之故用死人枕也氣因枕去故令埋於冢間也又春月出南籬間戲聞笮屋中有呻聲嗣伯曰此病甚重更二日不療必死乃往視見一老姥稱體痛而處處有黥黑無數嗣伯還煮斗餘湯送令服之服訖痛勢愈甚跳投床者無數須臾所黥處皆拔出釘長寸許以膏塗諸瘡口三日而復云此名釘疽也時又薛伯宗善徒癰疽公孫泰患背伯宗爲氣封之徙置齋前柳樹上明旦癰消樹邊便起一瘤如拳大稍稍長二十餘日瘤大膿爛出黃赤汁斗餘樹爲之痿損

論曰有晉自宅淮海張氏無乏賢良及宋齊之間雅道彌盛其前則云敷演鏡暢蓋其尤著者也然景胤敬愛之道少微立履所由其殆優矣思光行已卓越非常俗所遵齊高帝所云不可有二不

可無一斯言其幾得矣徐氏妙理通靈蓋非常所至雖古之和鵲何以加茲融與文伯款好故附之云爾

南史卷三十二 列傳第二十二 終

東川宅鳳臺  
氏庸祠附甫

南史卷三十三

列傳第二十三

東川宅鳳臺  
氏庸祠附甫

范泰 子曄

荀伯子 族子萬秋

徐廣 郗紹 廣兄子諮

鄭鮮之

裴松之 孫昭明 曾孫子野

何承天 曾孫遜

范泰字伯倫順陽人也祖汪晉安北將軍徐兗二州刺史父寧豫章太守並有名前代泰初為太學博士外弟荊州刺史王忱請為天門太守忱嗜酒醉輒累旬及醒則儼然端肅泰陳酒既傷生所宜深誠其言甚切忱嗟歎久之曰見規者眾未有若此者也或

問忱范泰何如謝邈忱曰茂度漫又問何如殷覲忱曰伯道易忱  
常有意立功謂泰曰今城池既立軍甲亦充將欲掃除中原以申  
宿昔之志伯道意銳當令擁戈前驅以君持重欲相委留事何如  
泰曰百年逋寇前賢挫屈者多矣功名雖貴鄙生所不敢謀會忱  
病卒召泰為驃騎諮議參軍遷中書郎時會稽世子元顯專權內  
外百官請假不復表聞唯籤元顯而已泰言以為非宜元顯不納  
以父憂去職襲爵遂鄉侯桓玄輔晉使御史中丞祖台之奏泰及  
前司徒左長史王汪之輔國將軍司馬珣之並居喪無禮泰坐廢  
徙丹徒宋武帝義旗建累遷黃門侍郎御史中丞坐議殷祠事謬  
白衣領職出為東陽太守歷侍中度支尚書時僕射陳郡謝混後  
進知名武帝嘗從容問混泰名輩誰比對曰王元一流人也徙為  
太常初司徒道規無子養文帝及道規薨以兄道璘璘第二子義慶

為嗣武帝以道規素愛文帝又令居重及道規追封南郡公應以  
先華容縣公賜文帝泰議以為禮無二主由是文帝還本屬後加  
散騎常侍為尚書兼司空與右僕射袁湛授宋公九錫隨軍到洛  
陽武帝還彭城與泰登城泰有足疾特命乘輿泰好酒不拘小節  
通率任心雖公坐笑言不異私室武帝甚賞愛之然短於為政故  
不得在政事官武帝受命議建國學以泰領國子祭酒泰上表陳  
獎進之道時學竟不立又言事者多以錢貨減少國用不足欲更  
造五銖泰又諫曰臣間為國拯弊莫若務本百姓不足君孰與足  
未有人貧而國富本不足而未有餘者也故囊漏貯中識者不吝  
反裘負薪存毛實難王者不言有無諸侯不說多少食祿之家不  
與百姓爭利故拔葵所以明政織蒲謂之不仁是以貴賤有章職  
分無爽今之所憂在農人尚寡倉廩未充轉運無已資食者眾家

無私積難以禦荒耳夫貨存貿易不在少多昔日之貴今者之賤彼此共之其揆一也但令官人均通則無患不足若使必資貨廣以收國用者則龜貝之屬自古所行尋銅之爲器在用也博矣鐘律所通者遠機衡所揆者大夏鼎負圖實冠衆瑞晉鐸呈象亦啓休徵器有要用則貴賤同資物有適宜則家國共急今毀必資之器而爲無施之錢於貨則功不補勞在用則君人俱困校之以實損多益少伏願思可久之道探欲速之情弘山海之納擇芻牧之說景平初加位特進明年致仕解國子祭酒少帝在位多諸愆失泰上封事極諫少帝雖不能納亦不加譴徐羨之傅亮等與泰素不平及廬陵王義真少帝見害泰謂所親曰吾觀古今多矣未有受遺顧託而嗣君見殺賢王嬰戮者也元嘉二年泰表賀元正并陳旱災多所獎勵拜表遂輕舟遊東陽任心行止不關朝廷有司

劾奏之文帝不問時文帝雖當陽親覽而美之等猶執重權泰復上表論得失言及執事諸子禁之表竟不奏三年羨之伏誅進位侍中左光祿大夫國子祭酒領江夏王師特進如故上以泰先朝舊臣恩禮甚重以有腳疾宴見之日特聽乘輿到坐所陳時事上每優遊之其年秋旱蝗又上表言有蝗之處縣官多課人捕之無益於枯苗有傷於殺害又女人被宥由來尙矣謝晦婦女猶在尙方疋婦一至亦能有所感激書奏上乃原謝晦婦女時司徒王弘輔政泰謂弘曰彭城王帝之次弟宜徵還入朝共參朝政弘納其言時旱災未已加以疾疫泰又上表有所勸誡泰博覽篇籍好爲文章愛獎後生孜孜無倦撰古今善言二十四篇及文集傳於世暮年事佛甚精於宅西立祇洹精舍五年卒初議贈開府殷景仁曰泰素望不重不可擬議台司竟不果及葬王弘撫棺哭曰君生

平重殷鐵今以此爲報追贈車騎將軍謚曰宣侯第四子畢最知名

畢字蔚宗母如廁產之額爲搏所傷故以搏爲小字出繼從伯弘之後襲封武興縣五等侯少好學善爲文章能隸書曉音律爲祕書丞父憂去職服闋爲征南大將軍檀道濟司馬領新蔡太守後爲尚書吏部郎元嘉元年彭城太妃薨將葬祖夕僚故並集東府畢與司徒左西屬王深及弟司徒祭酒廣夜中酣飲開北牖聽挽歌爲樂彭城王義康大怒左遷宣城太守不得志乃刪衆家後漢書爲一家之作至於屈伸榮辱之際未嘗不致意焉遷長沙王義欣鎮軍長史兄暲爲宜都太守嫡母隨暲在官亡報之以疾畢不時奔赴及行又攜伎妾自隨爲御史中丞劉損所奏文帝愛其才不罪也服闋累遷左衛將軍太子詹事畢長不滿七尺肥黑禿盾

鬢善彈琵琶能爲新聲上欲聞之屢諷以微旨畢僞若不曉終不肯爲上嘗宴飲歡適謂畢曰我欲歌卿可彈畢乃奉旨上歌既畢畢亦止弦初魯國孔熙先博學有從橫才志文史星算無不兼善爲員外散騎侍郎不爲時知久不得調初熙先父默之爲廣州刺史以贓貨下廷尉大將軍彭城王義康保持之故免及義康被黜熙先密懷報効以畢意志不滿欲引之無因進說畢甥謝綜雅爲畢所知熙先藉嶺南遺財家甚富足乃傾身事綜始與綜諸弟共博故爲拙行以物輸之情意稍款綜乃引熙先與畢戲熙先故爲不敵前後輸畢物甚多畢旣利其財寶又愛其文藝遂與申莫逆之好熙先始以微言動畢畢不回畢素有閨庭論議朝野所知故門胄雖華而國家不與姻以此激之曰丈人若謂朝廷相待厚者何故不與丈人婚爲是門戶不得邪人作犬豕相遇而丈人欲爲

南史三十三  
之死不亦惑乎畢默然不荅其意乃定時畢與沈演之並爲上所  
知待每被見多同畢若先至必待演之演之先至常獨被引畢又  
以此爲怨畢累經義康府佐見待素厚及宣城之授意好乖離綜  
爲義康大將軍記室參軍隨鎮豫章綜還申義康意於畢求解晚  
隙復敦往好畢既有逆謀欲探時旨乃言於上曰臣歷觀前史二  
漢故事諸蕃王政以妖詛幸災便正大逆之罰况義康姦心覺跡  
彰著邈邇而至今無恙臣竊惑焉且大梗常存將成亂階上不納  
熙先素善天文云文帝必以非道晏駕當由骨肉相殘江州應出  
天子以爲義康當之綜父述亦爲義康所遇綜弟約又是義康女  
夫故文帝使綜隨從南上旣爲熙先獎說亦有酬報之心廣州人  
周靈甫有家兵部曲熙先以六十萬錢與之使於廣州合兵靈甫  
一去不反大將軍府史仲承祖義康舊所信念屢銜命下都亦潛

結腹心規有異志聞熙先有誠密相結納丹陽尹徐湛之素爲義  
康所愛雖爲舅甥恩過子弟承祖因此結事湛之告以密計承祖  
南下申義康意於蕭思話及畢云本欲與蕭結婚恨始意不果與  
范本情不薄中間相失傍人爲之耳有法略道人先爲義康所養  
粗被知待又有王國寺法靜尼出入義康家內皆感激舊恩規相  
拯拔並與熙先往來使法略罷道法略本姓孫改名景玄以爲臧  
質寧遠參軍熙先善療病兼能詠脉法靜尼妹夫許耀領隊在臺  
宿衛殿省嘗有疾因法靜尼就熙先乞療得損因成周旋熙先以  
耀膽幹因告逆謀耀許爲內應豫章胡藩子遵世與法靜甚款亦  
密相酬和法靜尼南上熙先遣婢采藻隨之付以牋書陳說圖讖  
法靜還義康餉熙先銅七銅鑷袍段綦奩等物熙先慮事泄醜采  
藻殺之湛之又謂畢等臧質見與異常質與蕭思話款密二人並



受大將軍眷遇必無異同不憂兵力不足但當勿失機耳乃備相署置湛之爲撫軍將軍楊州刺史畢中軍將軍南徐州刺史熙先左衛將軍其餘皆有選擬凡素所不善及不附義康者又有別簿並入死目熙先使弟休先豫爲檄文言賊臣趙伯符肆兵犯蹕禍流諸宰乃奉戴義康又以旣爲大事宜須義康意旨乃作義康與湛之書宣示同黨二十二年九月征北將軍衡陽王義季右將軍南平王鑠出鎮上於虎帳岡祖道畢等期以其日爲亂許曜侍上扣刀以目畢畢不敢視俄而坐散差互不得發十一月徐湛之上表告狀於是悉出檄書選事及同惡人名手迹詔收綜等並皆款服唯畢不首上頻使窮詰乃曰熙先苟誣引臣熙先聞畢不服笑謂殿中將軍沈邵之曰凡諸處分符檄書疏皆畢所造及改定云何方作此抵上示以畢墨迹畢乃引罪明日送畢付廷尉入獄然

後知爲湛之所發熙先望風吐款辭氣不撓上奇其才使謂曰以卿之才而滯於集書省理應有異志此乃我負卿也熙先於獄中上書陳謝并陳天文占候誠上有骨肉相殘之禍其言深切畢後與謝綜等得隔壁遙問綜曰疑誰所告綜曰不知畢乃稱徐湛之小名曰乃是徐僮也在獄爲詩曰禍福本無兆性命歸有極必至定前期誰能延一息在生已可知來緣慳無識好醜共一丘何足異枉直豈論東陵上寧辯首山側雖無嵇生琴庶同夏侯色寄言生存子此路行復卽上有白團扇甚佳送畢令書出詩賦美句畢受旨援筆而書曰去白日之炤炤襲長夜之悠悠上循覽悽然畢本謂入獄便死而上窮其獄遂經二旬畢便有生望獄吏因戲之曰外傳詹事或當長繫畢聞之驚喜綜熙先笑之曰詹事嘗共論事無不攘袂瞋目及在西池射堂上躍馬顧盼自以爲一世之雄

而今擾攘紛紜畏死乃爾設令今時賜以性命人臣圖主何顏可  
以生存畢謂衛獄將曰惜哉埋如此人將曰不忠之人亦何足惜  
畢曰大將言是也及將詣市畢最在前於獄門顧謂綜曰次第當  
以位邪綜曰賊帥當爲先在道語笑初無慙恥至市問綜曰時欲  
至未綜曰勢不復久畢既食又苦勸綜曰此異疾篤何事強飯  
畢家人悉至市監刑職司問曰須相見不畢問綜曰家人已來幸  
得相見將不暫別綜曰別與不別亦何所在來必當號泣正足亂  
人意畢曰號泣何關人向見道邊親故相瞻望吾意故欲相見於  
是呼前畢妻先撫其子回罵畢曰君不爲百歲阿家不感天子恩  
遇身死固不足塞罪柰何枉殺子孫畢乾笑云罪至而已畢所生  
母對泣曰主上念汝無極汝曾不能感恩又不念我老今日柰何  
仍以手擊畢頸及頰畢妻云罪人阿家莫憶莫念妹及妓妾來別

畢乃悲泣流漣綜曰舅殊不及夏候色畢收淚而止綜母以子弟  
自陷逆亂獨不出視畢語綜曰姊今不來勝人多也畢轉醉子誦  
亦醉取地土及果皮以擲畢呼爲別駕數十聲畢問曰汝瞋我邪  
誦曰今日何緣復瞋但父子同死不能不悲耳畢常謂死爲滅欲  
著無鬼論至是與徐湛之書當相訟地下其謬亂如此又語人寄  
語音僕射天下決無佛鬼若有靈自當相報收畢家樂器服玩並  
皆珍麗妓妾亦盛飾母住止單陋唯有二厨盛蘄薪弟子冬無被  
叔父單布衣畢及黨與並伏誅畢時年四十八謝綜弟緯徙廣州  
誦子魯連吳興昭公主外孫請全生命亦得遠徙孝武卽位乃還  
畢性精微有思致觸類多善衣裳器服莫不增損制度世人皆法  
學之撰和香方其序之曰麝本多忌過分必害沈實易和盈斤無  
傷零藿虛燥詹唐黏濕甘松蘇合安息鬱金柰多和羅之屬並被

珍於外國無取於中土又棗膏昏鈍甲煎淺俗非唯無助於馨烈  
乃當彌增於尤疾也所言悉以比類朝士麝本多烈比庾仲文零  
藿虛燥比何尚之詹唐黏濕比沈演之棗膏昏鈍比羊玄保甲煎  
淺俗比徐湛之甘松蘇合比慧琳道人沈實易和以自比也畢獄  
中與諸生姪書以自序其略曰吾少懶學問年三十許始有尚耳  
自爾以來轉爲心化至於所通處皆自得之胸懷常謂情志所託  
故當以意爲主以文傳意以意爲主則其旨必見以文傳意則其  
辭不流然後抽其芬芳振其金石耳觀古今文人多不全了此處  
年少中謝莊最有其分手筆差易於文不拘韻故也吾思乃無定  
方但多公家之言少於事外遠致以此爲恨亦由無意於文名故  
也本末開史書政恒覺其不可解耳既造後漢轉得統緒詳觀古  
今著述及評論殆少可意者班氏最有高名既任情無例唯志可

推耳博瞻可不及之整理未必愧也吾雜傳論皆有精意深旨至  
於循吏以下及六夷諸序論筆勢縱放實天下之奇作其中合者  
往往不減過秦篇嘗共比方班氏所作非但不愧之而已欲徧作  
諸志前漢可有者悉令備雖事不必多且使見文得盡又欲因事  
就卷內發論以正一代得失意復不果贊自是吾文傑思殆無一  
字空設奇變不窮同合異體乃自不知所以稱之此書行故應有  
賞音者紀傳例爲舉其大略耳諸細意甚多自古體大而思精未  
有此也恐世人不能盡之多貴古賤今所以稱情狂言耳吾於音  
樂聽功不及自揮但所精非雅聲爲可恨然至於一絕處亦復何  
異邪其中體趣言之不可盡絃外之意虛響之音不知所從而來  
亦嘗以授人士庶中未有一毫似者此永不傳矣吾書雖小小有  
意筆勢不快餘竟不成就每愧此名曩自序並實故存之請幼而

整潔衣服竟歲未嘗有塵黠死時年二十彙少時兄晏常云此兒  
進利終破門戶果如其言初何尚之處銓衡自謂天下無滯才及  
熙先就拘帝詰尚之曰使孔熙先年三十猶作散騎侍郎那不作  
賊熙先死後又謂尚之曰孔熙先有美才地胃猶可論而翳迹仕  
流豈非時匠失乎尚之曰臣昔謬得待罪選曹誠無以濯汗揚清  
然君子之有智能猶鸞鳳之有文采俟時而振羽翼何患不出雲  
霞之上若熙先必蘊文采自棄於汙泥終無論矣上曰昔有良才  
而不遇知己者何嘗不遺恨於後哉

荀伯子潁川潁陰人晉驃騎將軍羨之孫也父倚祕書郎伯子少  
好學博覽經傳而通率好爲雜語遨遊閭里故以此失清途解褐  
駙馬都尉奉朝請員外散騎侍郎著作郎徐廣重其才學舉伯子  
及王韶之並爲佐郎同撰晉史及著桓玄等傳遷尚書祠部郎義

熙元年上表稱故太傅鉅平侯羊祜勲參佐命功盛平吳而享嗣  
闕然蒸嘗莫寄漢以蕭何元功故絕世輒紹愚謂鉅平之封宜同  
鄴國故太尉廣陵公陳淮黨翼孫秀禍加淮南竊饗大國因罪爲  
利會西朝政刑失裁中興復因而不奪今王道惟新豈可不大判  
臧否謂廣陵之國宜在削除故太保衛瓘本爵舊陽縣公旣被橫  
禍乃進第秩加贈蘭陵又轉江夏中朝公輔多非理終瓘功德不  
殊亦無緣獨受偏賞宜復本封以正國章詔付門下前散騎常侍  
江夏公衛璜及潁川陳茂先各自陳先代勲不伏貶降詔皆付門  
下並不施行伯子爲妻弟謝晦薦達爲尚書左丞出補臨川內史  
車騎將軍王弘稱伯子沈重不華有平陽侯之風伯子常自矜藉  
蔭之美謂弘曰天下膏粱唯使君與下官耳宣明之徒不足數也  
遷散騎常侍又上表曰百官位次陳留王在零陵王上臣愚竊以

爲疑昔武王克殷封神農後於焦黃帝後於祝帝堯後於薊帝舜  
後於陳夏后後於杞殷後於宋杞陳並爲列國而薊祝焦無聞斯  
則褒崇所承優於遠代之顯驗也是以春秋次序諸侯宋居杞陳  
之上考之近代事亦有徵晉泰始元年詔賜山陽公劉康子弟一  
人爵關內侯衛公姬署宋侯孔紹子弟一人駙馬都尉又泰始三  
年太常上言博士劉嘉等議稱衛公署於大晉在三恪之數應降  
稱侯臣以爲零陵王位宜在陳留之上從之爲御史中丞莅職勤  
恪有匪躬之稱立朝正色衆咸憚之凡所奏劾莫不深相訶毀或  
延及祖彌示其切直又頗雜嘲戲故世人以此非之補司徒左長  
史卒於東陽太守文集傳於世子赤松爲尚書右丞以徐湛之黨  
爲元凶所殺伯子族弟昶字茂祖與伯子絕服元嘉初以文義至  
中書郎昶子萬秋萬秋字元寶亦用才學自顯昶見釋慧林謂曰

昨萬秋對策欲以相示昶曰此不須看若非先見而答貧道不能  
爲若先見而答貧道奴皆能爲昶曰此將不傷道德耶昶曰大德  
所以不德乃相對笑竟不看焉萬秋孝武初爲晉陵太守坐於郡  
立華林閣置主衣主書下獄免前廢帝末爲御史中丞卒官

徐廣字野人東莞姑幕人也父藻都水使者兄邈太子前衛率家  
世好學至廣尤精百家數術無不研覽家貧未嘗以產業爲意妻  
中山劉謐之女忿之數以相讓廣終不改如此十數年家道日弊  
遂與廣離後晉孝武帝以廣博學除爲秘書郎校書祕閣增置職  
僚隆安中尚書令王珣舉爲祠部郎李太后崩廣議服曰太皇太  
后名位既正體同皇極理制備盡情禮彌申陽秋之義母以子貴  
旣稱夫人禮服從正故成風顯夫人之號昭公服三年之喪子於  
父之所生體尊義重且禮祖不厭孫固宜遂服無屈而緣情立制

若嫌明文不存則疑斯從重謂應同於為祖母後齊衰三年時從其議及會稽王世子元顯錄尚書欲使百僚致敬臺內使廣立議由是內外並執下官禮廣常為愧恨義熙初宋武帝使撰車服儀注仍除鎮軍諮議參軍領記室封樂成縣五等侯轉員外散騎常侍領著作郎二年尚書奏廣撰成晉史六年遷驍騎將軍時有風雹為災廣獻言武帝多所勸免又轉大司農領著作郎遷祕書監初桓玄篡位安帝出宮廣陪列悲慟哀動左右及武帝受禪恭帝遜位廣又哀感涕泗交流謝晦見之謂曰徐公將無小過廣收淚荅曰身與君不同君佐命興王逢千載嘉運身世荷晉德眷戀故主因更欷歔永初元年詔除中散大夫廣言墳墓在晉陵丹徒又生長京口息道玄叅宰此邑乞隨之官歸終桑梓許之贈賜甚厚性好讀書年過八十猶歲讀五經一遍元嘉二年卒廣所撰晉紀

四十二卷義熙十二年成表上之又有荅禮問百餘條行於世時有高平郗紹亦作晉中興書數以示何法盛法盛有意圖之謂紹曰卿名位貴達不復俟此延譽我寒士無聞於時如袁宏于寶之徒賴有著述流聲於後宜以為惠紹不與王書成在齋內厨中法盛詣紹紹不在直入竊書紹還失之無復兼本於是遂行何書徐豁字萬同廣兄子也父邈晉太子前衛率豁宋永嘉初為尚書左丞山陰令精練法理為時所推元嘉初為始興太守表陳三事文帝嘉之賜絹二百匹穀一千斛徙廣州刺史未拜卒鄭鮮之字道子滎陽開封人魏將作大匠渾之玄孫也祖襲大司農經為江乘令因居縣境父遵尚書郎鮮之下帷讀書絕交遊之務初為桓偉輔國主簿先是兗州刺史滕恬恬作恬為丁零翟所沒屍喪不反恬子羨仕官不廢論者嫌之桓玄在荊州使郡僚博議鮮之

議曰名教大極忠孝而已至乎變通抑引每事輒殊本而尋之皆求心而遺迹迹之所乘遭遇或異故聖人或就迹以助教或因迹以成罪屈申與奪難可等齊舉其阡陌皆可終言矣天可逃乎而伊尹廢君君可脇乎而鬻拳見善忠可愚乎而箕子同仁自此以還殊實而齊聲異譽而等美者不可勝言令如滕羨情事者或終身隱處不關人事或升朝理務無譏前哲通勝者則以無譏爲證塞勝者則以隱處爲美折其兩中則異同之情可見矣夫聖人立教猶言有禮無時君子不行有禮無時政以事有變通不可宗一故耳宋武帝起義兵累遷御史中丞性剛直甚得司直之體外甥劉毅權重當時朝野莫不歸附鮮之盡心武帝獨不屈意於毅毅甚恨焉以與毅舅甥制不相糺使書侍御史丘洹洹一作恒奏彈毅輒宥傳詔羅道盛詔無所問時新制長吏以父母疾去官禁錮三年山陰

令沈淑任父疾去職鮮之因此上議曰父母之疾而加以罪名悖義疾理莫此爲大謂宜從舊於義爲允從之於是自二品以上父母及爲祖父母後者墳墓崩毀及疾病族屬輒去並不禁錮劉毅當鎮江陵武帝會於江寧朝士畢集毅素好樗蒲於是會戲帝與毅歛局各得其半積錢隱人毅呼帝併之先擲得雉帝甚不悅良久乃荅之四坐傾屬旣擲得盧毅意大惡謂帝曰知公不以大坐席與人鮮之大喜徒跣繞床大叫聲聲相續毅甚不平謂之曰此鄭君何爲者無復甥舅之敬帝少事戎旅不經涉學及爲宰相頗慕風流時或談論人皆依違不敢難鮮之難必切至未嘗寬假與帝言要須帝理屈然後置之帝有時慙恚變色感其輸情時人謂爲格佞十二年武帝北伐以爲右長史鮮之曾祖晉江州長史哲墓在開封求拜省帝以騎送之及入咸陽帝遍視阿房未央故地

悽愴動容問鮮之秦漢所以得喪鮮之具以賈誼過秦對帝曰及子嬰而亡已爲晚矣然觀始皇爲人智足見是非所任不得人何也荅曰夫佞言似忠奸言似信中人以上乃可語上始皇未及中人所以暗於識士前至渭濱帝復嘆曰此地寧復有呂望邪鮮之曰昔葉公好龍而真龍見燕昭市骨而駿足至明公以旰食待士豈患海內無人帝稱善者久之宋國初建轉奉常赫連勃勃陷關中武帝復欲北討鮮之表諫及踐祚遷太常都官尚書時傅亮謝晦位遇日隆范泰嘗衆中讓誚鮮之曰卿與傅謝俱從聖左有功關洛卿乃居僚首今日荅颯去人遼遠何不肖之甚鮮之熟視不對鮮之爲人通率在武帝坐言無所隱晦亦甚憚焉而隱厚篤實瞻恤親故遊行命駕或不知所適隨御者所之尤爲武帝所狎上會內殿宴飲朝貴畢至唯不召鮮之坐定謂群臣曰鄭鮮之必當

自來俄而外啓尚書鄭鮮之詣神獸門求啓事帝大笑引入其被遇如此以從征功封龍陽縣五等子景平中徐傅當權出爲豫章太守時王弘爲江州刺史竊謂人曰鄭公德素先朝所禮方於前代鍾元常王景興之流今徐傅出以爲郡抑當有以尋有廢立事元嘉三年弘入爲相舉鮮之爲尚書右僕射四年卒文集行於世子愔始安太守

裴松之字世期河東聞喜人也祖昧光祿大夫父珪正員外郎松之博覽墳籍立身簡素年二十拜殿中將軍此官直衛左右晉孝武太元中華選名家以參顧問始用琅邪王茂之會稽謝輅皆南北之望義熙初爲吳興故鄣令在縣有績入爲尚書祠部郎松之以世立私碑有乖事實上表陳之以爲諸欲立碑者宜悉令言上爲朝議所許然後聽之庶可以防遏無徵顯彰茂實由是普斷武



帝北伐領司州刺史以松之爲州主簿轉中從事既尅洛陽松之居州行事宋國初建毛德祖使洛陽武帝敕之曰裴松之廊廟之才不宜久居邊務今召爲太子洗馬與殷景仁同可令知之時議立五廟樂松之以妃臧氏廟用樂亦宜與四廟同除零陵內史徵爲國子博士元嘉三年誅司徒徐羨之等分遣大使巡行天下並兼散騎常侍班宣二十四條詔書松之使湘州甚得奉使之義論者美之轉中書侍郎上使注陳壽三國志松之鳩集傳記廣增異聞旣成奏之上覽之曰裴世期爲不朽矣出爲永嘉太守勤恤百姓吏人便之後爲南琅邪太守致仕拜中散大夫尋爲國子博士進太中大夫使續成何承天國史未及撰述卒子駟南中郎參軍松之所著文論及晉記駟注司馬遷史記並行於世駟子昭明昭明少傳儒史之業宋秦始中爲太學博士有司奏太子婚納徵

用玉璧虎皮未詳何所準擬昭明議禮納徵儷皮鄭云皮爲庭實鹿皮也晉太子納妃注以虎皮二太元中公主納徵虎豹皮各一此豈謂婚禮不詳王公之差故取虎豹文蔚以尊其事虎豹雖文而徵禮所不言熊羆雖古而婚禮所不及珪璋雖美或爲用各異今宜準經誥凡諸僻謬一皆詳正於是有司參議加珪璋豹熊羆皮各二元徽中出爲長沙郡丞罷任刺史王蘊之謂曰卿清貧必無還資湘中人士有須一禮之命者我不愛也昭明曰下官忝爲郡佐不能光益上府豈以鴻都之事仰累清風歷祠部通直郎齊永明三年使魏武帝謂曰以卿有將命之才使還當以一郡相賞還爲始安內史郡人龔玄宜云神人與其玉印玉板書不須筆吹紙便成字自稱龔聖人以此惑衆前後郡太守敬事之昭明付獄案罪及還甚貧罄武帝曰裴昭明當罷郡還遂無宅我不讀書不

知古人中誰可比之遷射聲校尉九年復北使建武初爲王玄邈  
安北長史廣陵太守明帝以其在事無啟奏代還責之昭明日臣  
不欲競執關鍵故耳昭明歷郡皆清勤常謂人曰人生何事須聚  
畜一身之外亦復何須子孫若不才我聚彼散若能自立則不如  
一經故終身一不事產業中興二年卒子子野

子野字幾原生而母魏氏亡爲祖母殷氏所養殷柔明有文義以  
章句授之年九歲殷氏亡泣血哀慟家人異之少好學善屬文仕  
齊爲江夏王行參軍遭父憂去職初父寢疾彌年子野禱請備至  
涕泗霑濡父夜夢見其容且召視如夢俄而疾間以爲至孝所感  
命著孝感傳固辭乃止及居喪每之墓所草爲之枯有白兔白鳩  
馴擾其側梁天監初尚書僕射范雲嘉其至行將表奏之會雲卒  
不果樂安任昉有盛名爲後進所慕遊其門者昉必推薦子野於

昉爲從中表獨不至昉亦恨焉故不之善久之兼廷尉正時三官  
通署獄子野嘗不在同僚輒署其名奏有不允子野從坐免職或  
勸言請有司可無咎子野笑曰雖慙柳季之道豈因訟以受服自  
此免黜久之終無恨意中書郎范縝與子野未遇聞其行業而善  
焉會遷國子博士乃上表讓之有司以資歷非次不爲通後爲諸  
暨今在縣不行鞭罰人有爭者示之以理百姓稱悅合境無訟初  
子野曾祖松之宋元嘉中受詔續修何承天宋史未成而卒子野  
常欲繼成先業及齊永明末沈約所撰宋書稱松之已後無聞焉  
子野更撰爲宋略二十卷其叙事評論多善而云戮淮南太守沈  
璞以其不從義師故也約懼徒跣謝之請兩釋焉歎其述作曰吾  
弗逮也蘭陵蕭琛言其評論可與過秦王命分路揚鑣於是吏部  
尚書徐勉言之於武帝以爲著作郎掌修國史及起居注項之兼中

書通事舍人尋除通直員外著作舍人如故敕又掌中書詔詰時西北遠邊有白題及滑國遣使由岷岷作山道人貢此二國歷代弗賓莫知所出子野曰漢潁陰侯斬胡白題將一人服虔注云白題胡名也又漢定遠侯擊虜入滑此其後乎時人服其博識敕仍使撰方國使圖廣述懷來之盛自要服至于海表凡二十國子野與沛國劉顯南陽劉之遴陳郡殷芸陳留阮孝緒吳郡顧協京兆韋稜皆博學深相賞好顯尤推重之時長平侯蕭勸范陽張纘每討論墳籍咸折衷於子野繼母曹氏亡居喪過禮服闋再遷員外郎普通七年大舉北侵敕子野為移魏文受詔立成武帝以其事體人召尚書僕射徐勉太子詹事周捨鴻臚卿劉之遴中書侍郎朱异集壽光殿以觀之時並歎服武帝日子野曰其形雖弱其文甚壯俄又敕為書喻魏相元乂其夜受旨子野謂可待旦方奏未之為

也及五鼓敕催令速上子野徐起操筆昧爽便就及奏武帝深嘉焉自是諸符檄皆令具草子野為文典而速不尚靡麗制多法古與今文體異當時或有詆訶者及其末翕然重之或問其為文速者子野荅云人皆成於手我獨成於心遷中書侍郎鴻臚卿領步兵校尉子野在禁省十餘年默靜自守未嘗有所請謁外家及中表貧乏所得奉悉給之無宅借官地二畝起茅屋數間妻子恒苦饑寒唯以教誨為本子姪祇畏若奉嚴君劉顯常以師道推高之末年深信釋教終身飯麥食蔬中大通二年卒先是子野自占死期不過戊戌歲是年自省移疾謂同官劉之亨曰吾其逝矣遺命務存儉約武帝悼惜為之流涕贈散騎常侍即日舉哀先是五等君及侍中以上乃有謚及子野特以令望見嘉賜謚貞子子野少時集注喪服續裴氏家傳各二卷抄合後漢事四十餘卷又敕撰

南史三十三  
衆僧傳二十卷百官九品二卷附益謚法一卷方國使圖一卷文集二十卷並行於世又欲撰齊梁春秋始草創未就而卒及葬湘東王爲之墓誌銘陳于藏內邵陵王又立墓誌堙于美道美道列誌自此始焉子騫官至通直郎

何承天東海鄉人也五歲喪父母徐廣姊也聰明博學故承天幼漸訓義宋武起義初撫軍將軍劉毅鎮姑熟板爲行參軍毅嘗出行而陽陵縣吏陳滿射鳥箭誤中直帥雖不傷人處法棄市承天議曰獄貴情斷疑則從輕昔有驚漢文帝乘輿馬者張釋之劾以犯蹕罪止罰金何者明其無心於驚馬也故不以乘輿之重加於異制今滿意在射鳥非有心於中人案律過誤傷人三歲刑况不傷乎徵罰可也宋臺建爲尚書祠部郎與傅亮共撰朝儀謝晦鎮江陵請爲南蠻長史晦進號衛將軍轉諮議參軍領訖室元嘉三

年晦將見討問計於承天曰大小旣殊逆順又異境外求全上計也以腹心領兵戍義陽將軍率衆於夏口一戰若敗卽趨義陽以出北境此其次也晦良久曰荆楚用武之國且當決戰走不晚也及晦下承天留府不從到彥之至馬頭承天自詣歸罪見宥後兼尚書左丞吳興餘杭人薄道舉爲劫制同籍暮親補兵道舉從弟代公道生等並爲劫大功親非應在補謫之例法以代公等母存爲暮親則子宜隨母補兵承天議曰尋劫制同籍暮親補兵大功則不在例婦人三從旣嫁從夫夫死從子今道舉爲劫若其叔父尚存應制補謫妻子營居固其宜也但爲劫之時叔父已歿代公道生並是從弟大功之親不合補謫今若以叔母爲暮親令代公隨母補兵旣乖大功不謫之制又失婦人三從之道由於主者守暮親之文不辯男女之異謂代公等母子並宜見原承天爲性剛

懷不能屈意朝右頗以所長侮同列不爲僕射殷景仁所平出爲  
衡陽內史昔在西方與士人多不協在郡又不公清爲州司所糾  
被收繫獄會赦免十六年除著作佐郎撰國史承天年已老而諸  
佐郎並名家年少頴川荀伯子嘲之常呼爲妳母承天曰卿當云  
鳳凰將九子妳母何言邪尋轉太子率更令著作如故時丹陽溧  
陽丁况等久喪而不葬承天議曰禮云還葬當謂荒儉一時故許  
其稱財而不求備丁况三家數十年中葬輒無棺槨實由淺情薄  
恩同於禽獸者耳竊以丁寶等同伍積年未嘗勸之以義繩之以  
法十六年冬旣無新科又未申明舊制有何嚴切欬然相糾或由  
隣曲分爭以興此言如聞在東諸處比例旣多江西淮北尤爲不  
少若但謫此三人殆無所肅開其一端則互相恐動臣愚爲况等  
三家且可勿問因此附定制旨若人葬不如法同伍當卽糾言

年除服之後不得追相告引十九年立國子學以本官領國子博  
士皇太子講孝經承天與中庶子顏延之同爲執經頃之遷御史  
中丞時魏軍南伐文帝訪羣臣捍禦之略承天上安邊論凡陳四  
事其一移遠就近以實內地其二浚復城隍以增阻防其三纂偶  
車牛以飾戎械其四計丁課仗勿使有關文多不載承天素好奕  
碁頗用廢事又善彈箏文帝賜以局子及銀裝箏承天奉表陳謝  
上荅曰局子之賜何必非張武之金邪承天博見古今爲一時所  
重張永嘗開玄武湖遇過古冢冢上得一銅斗有柄文帝以訪朝士  
承天曰此亡新威斗王莽三公亡皆賜之一在冢外一在冢內時  
三台居江左者唯甄邯爲大司徒必邯之墓俄而永又啓冢內更  
得一斗復有一石銘大司徒甄邯之墓時帝每有疑議必先訪之  
信命相望於道承天性褊促嘗對主者厲聲曰天何言哉四時行

焉百物生焉文帝知之應遣先戒曰善候伺何顏色如其不悅無須多陳二十四年承天遷廷尉未拜上欲以為吏部郎已受密旨承天宣漏之坐免官卒於家年七十八先是禮論有八百卷承天刪減并合以類相從凡為三百卷并前傳雜語所纂文及文集並傳於世又改定元嘉歷改漏刻用二十五箭皆從之曾孫遜

遜字仲言八歲能賦詩弱冠州舉秀才南鄉范雲見其對策大相稱賞因結忘年交謂所親曰頃觀文人質則過懦作麗則傷俗其能含清濁中今古見之何生矣沈約嘗謂遜曰吾每讀卿詩一日三復猶不能已其為名流所稱如此梁天監中兼尚書水部郎南平王引為賓客掌記室事後薦之武帝與吳均俱進倖後稍失意帝曰吳均不均何遜不遜未若吾有朱异信則異矣自是疎隔希復得見卒於仁威廬陵王記室初遜為南平王所知深被恩禮及聞

遜卒命迎其柩而殯藏焉并餼其妻子東海王僧孺集其文為八卷初遜文章與劉孝綽並見重時謂之何劉梁元帝著論論之云詩多而能者沈約少而能者謝朓何遜遜從叔憫字彥夷亦以才著聞宦遊不達作拍張賦以喻意末云東方曼倩發憤於侏儒遂與火頭食子稟賜不殊位至臺郎時有會稽虞騫工為五言名與遜埒官至王國侍郎後又有會稽孔翁歸濟陽江避並為南平王大司馬府記室翁歸工為詩避博學有思理注論語孝經二人並有文集

論曰夫令聞作望詩人所以作詠有禮有法前哲由斯播美觀夫范荀二公並以學業自著而干時之譽本不期俱不為弘雖才則有餘而望乃不足蔚宗藝用有過人之美迹其行事何利害之相傾徐廣動不違仁義兼儒行鮮之時稱格佞斯不佞矣松之雅道為

貴寔光載德承天素訓所資無慙舅氏美矣乎

南史卷三十四

列傳第二十四

唐川中鳳園  
氏閣周周甫

顏延之

子竣 從子師伯

沈懷文

子冲 從兄曇慶

周朗

族孫顥 昭字捨 捨弟子弘正 弘讓 弘直 子確

顏延之字延年琅邪臨沂人也曾祖含晉左光祿大夫祖約零陵太守父顥護軍司馬延之少孤貧居負郭好讀書無所不覽文章冠絕當時好飲酒不護細行年三十猶未昏妹適東莞劉穆之子憲之穆之聞其美才將仕之先欲相見延之不往也後為宋武帝豫章公世子中軍行參軍及武帝北伐有宋公之授府遣延之慶殊命行至洛陽周視故宮室盡為禾黍悽然詠黍離篇道中作詩二首為謝晦傅亮所賞武帝受命補太子舍人雁門周續之隱廬

山儒學著稱永初中徵詣都下開館以居之武帝親幸朝彥畢至延之宮官列卑引升上席上使問續之三義續之雅杖辭辯延之每以簡要連挫續之上又使還自敷釋言約理暢莫不稱善再遷太子中舍人時尚書令傅亮自以文義一時莫及延之負其才不爲之下亮甚疾焉廬陵王義真待之甚厚徐羨之等疑延之爲同異意甚不悅少帝卽位累遷始安太守領軍將軍謝晦謂延之曰昔荀勗忌阮咸斥爲始平郡今卿又爲始安可謂二始黃門郎殷景仁亦謂之曰所謂人惡俊異世疵文雅延之之郡道經汨潭爲湘州刺史張邵祭屈原文以致其意元嘉三年羨之等誅徵爲中書侍郎轉太子中庶子領步兵校尉賞遇甚厚延之旣以才學見遇當時多相推服唯袁淑年倍小延之不相推重延之忿於衆中折之曰昔陳元方與孔元駿齊年文學元駿拜元方於牀下今君

何得不見拜淑無以對延之疎誕不能取容當世見劉湛殷景仁專當要任意有不平常言天下事豈一人之智所能獨了辭意激揚每犯權要又少經爲湛父柳後將軍主簿至是謂湛曰吾名器不升當由作卿家吏耳湛恨焉言於彭城王義康出爲永嘉太守延之甚怨憤乃作五君詠以述竹林七賢山濤王戎以貴顯被黜詠嵇康云鸞翮有時鍛龍性誰能馴詠阮籍云物故不可論途窮能無慟詠阮咸云屢薦不入官一麾乃出守詠劉伶云韜精日沈飲誰知非荒宴此四句蓋自序也湛及義康以其辭旨不遜大怒欲黜爲遠郡文帝與義康詔曰宜令思愆里閭猶復不悛當驅往東土乃至難恕者自可隨事錄之於是延之屏居不豫人間者七載中書令王球以名公子遺務事外與延之雅相愛好每振其聲匱晉恭思皇后葬應須百官皆取義熙元年除身以延之兼持邑



吏送札延之醉投札於地曰顏延之未能事生焉能事死文帝嘗  
召延之傳詔頗不見常日但酒店裸袒挽歌了不應對他日醉醒  
乃見帝嘗問以諸子才能延之曰竣得臣筆測得臣文龔得臣義  
躍得臣酒何尚之嘲曰誰得卿狂荅曰其狂不可及尚之爲侍中  
在直延之以醉詣焉尚之望見便陽眠延之發簾熟視曰朽木難  
雕尚之謂左右曰此人醉甚可畏閑居無事爲庭誥之文以訓子  
弟劉湛誅後起延之爲始興王濬後軍諮議參軍御史中丞在任  
從容無所舉奏遷國子祭酒司徒左長史何尚之素與延之狎書  
與王球曰延之有後命教府無復光暉坐啟買人田不肯還直尚  
書左丞荀赤松奏之曰求田問舍前賢所鄙延之唯利是視輕冒  
陳聞依傍詔恩抵捍餘直垂及周年猶不畢了昧利苟得無所顧  
忌延之昔坐事屏斥復蒙抽進而曾不悛革怨誹無已交游鬪茸

沈迷麴蘖橫興譏謗詆毀朝士仰竊過榮增憤薄之性私恃顧盼  
成強梁之心外示寡求內懷奔競干祿祈遷不知極已預宴班觴  
肆詈上席山海容含每存遵養愛兼雕蟲未忍遐棄而驕放不節  
日月彌甚臣聞聲問過情孟軻所恥況聲非外來問由已出雖心  
智薄劣而高自比擬客氣虛張曾無愧畏豈可復弼亮五教增耀  
台階請以延之訟田不實妄干天聽以強凌弱免所居官詔可後  
爲秘書監光祿勳太常時沙門釋慧琳以才學爲文帝所賞朝廷  
政事多與之謀遂士庶歸仰上每引見常升獨榻延之甚疾焉因  
醉白上曰昔同子參乘袁綵正色此三台之坐豈可使刑餘居之  
上變色延之性旣褊激兼有酒過肆意直言曾無回隱故論者多  
不與之謂之顏彪居身儉約不營財利布衣蔬食獨酌郊野當其  
爲適傍若無人三十年致事元凶弒立以爲光祿大夫長子竣爲

孝武南中郎諮議參軍及義師入討竣定密謀兼造書檄劾召延之示以檄文問曰此筆誰造延之曰竣之筆也又問何以知之曰竣筆體臣不容不識劾又曰言辭何至乃爾延之曰竣尚不顧老臣何能爲陛下劾意乃釋由是得免孝武登祚以爲金紫光祿大夫領湘東王師嘗與何偃同從上南郊偃於路中遙呼延之曰顏公延之以其輕脫怪之荅曰身非三公之公又非田舍之公又非君家阿公何以見呼爲公偃羞而退竣既貴重權傾一朝凡所資供延之一無所受器服不改宅宇如舊常乘羸牛車逢竣鹵簿卽屏住道側又好騎馬遨游里巷遇知舊輒據鞶索酒得必傾盡欣然自得嘗語竣曰平生不喜見要人今不幸見汝見竣起宅謂曰善爲之無令後人笑汝拙也表解師職加給親信二十人嘗早候竣遇賓客盈門竣方臥不起延之怒曰恭敬擗節福之基也驕佞

傲慢禍之始也況出糞土之中而升雲霞之上傲不可長其能久乎延之有愛姬非姬食不飽寢不安姬憑寵嘗盪延之墜牀致損竣殺之延之痛惜甚至常坐靈上哭曰貴人殺汝非我殺汝以冬日臨哭忽見妾排屏風以壓延之延之懼墜地因病孝建三年卒年七十三贈特進謚曰憲子延之與陳郡謝靈運俱以辭采齊名而遲速懸絕文帝嘗各敕擬樂府北上篇延之受詔便成靈運久之乃就延之嘗問鮑照已與靈運優劣照曰謝五言如初發芙蓉自然可愛君詩若鋪錦列繡亦雕績滿眼延之每薄湯惠休詩謂人曰惠休制作委巷中歌謠耳方當誤後事是時議者以延之靈惠自潘岳陸機之後文士莫及江右稱潘陸江左稱顏謝焉竣字士遜延之長子也早有文義爲宋孝武帝撫軍主簿甚被嘉遇竣亦盡心補益元嘉中上不欲諸王各立朋黨將召竣補尚書

郎江湛以爲在府有稱不宜回改乃止隨府轉安北領軍北中郎  
府主簿初沙門釋僧含精有學義謂竣曰貧道常見識記當有真  
人應符名稱次第屬在殿下後竣在彭城嘗於親人叙之言遂宣  
布聞於文帝時元凶巫蠱事已發故上不加推案孝武鎮尋陽遷  
南中郎記室三十年春以父延之致仕固求解職賜假未發而文  
帝崩問至孝武舉兵入討轉諮議參軍領軍錄事任總內外并造  
檄書孝武發尋陽便有疾自沈慶之以下竝不堪相見唯竣出入  
臥內斷決軍機時孝武屢經危篤不任諮稟凡厥衆務竣皆專斷  
施行孝武踐祚歷侍中左衛將軍封建城縣侯孝建元年轉吏部  
尚書領驍衛將軍留心選舉自強不息任遇既隆奏無不可後謝  
莊代竣領選意多不行竣容貌嚴毅莊風姿甚美賓客喧訴常歡  
笑荅之人言顏竣曠而與人官謝莊笑而不與人官南郡王義宣

臧質等反以竣兼領右將軍義宣質諸子藏匿建康秣陵湖熟江  
寧縣界孝武大怒免丹陽尹褚湛之官收四縣官長以竣爲丹陽  
尹加散騎常侍先是竣未有子而司馬江夏王義恭諸子爲元凶  
所殺至是各產男上自爲制名名義恭子爲伯禽以比魯公伯禽  
周公之子名竣子爲辟彊以比漢侍中辟彊張良之子也先是元  
嘉中鑄四銖錢輪郭形制與五銖同用費無利故百姓不盜鑄及  
孝武卽位又鑄孝建四銖所鑄錢形式薄小輪郭不成於是人間  
盜鑄者雜以鉛錫竝不牢固又翦鑿古錢以取其銅錢轉薄小稍  
違官式雖重制嚴刑人吏官長坐死免者相係而盜鑄彌甚百物  
踊貴人患苦之乃立品格薄小無輪郭者悉加禁斷始興公沈慶  
之議宜聽人鑄錢置署樂鑄之家皆居署內去春所禁新品一時  
施用今鑄悉依此格萬稅三千嚴檢盜鑄并禁翦鑿數年之間公

私豐贍銅盡事息姦僞自止禁鑄則銅轉成器開鑄則器化爲財  
上下其事於公卿竣議曰今云開署放鑄誠所欲同但慮采山事  
絕器用日耗銅旣轉少器亦彌貴設器直一千則鑄之減半爲之  
無利雖令不行時議者又以銅難得欲鑄二銖錢竣又議曰今鑄  
二銖恣行新細於官無解於乏而人大興天下之貨將糜碎至盡  
空曰嚴禁而利深難絕不過一二年間其弊不可復救此其甚不  
可一也使姦人意騁而貽厥愆謀此又甚不可二也富商得志貧  
人困窘此又甚不可三也若使交益深重尚不可行況又未見利  
而衆弊如此失算當時取笑百代乎前廢帝卽位鑄二銖形式轉  
細官錢每出人間卽模效之而大小厚薄皆不及也無輪郭不磨  
鑄如今之翦鑿者謂之來子錢景和元年沈慶之啓通私鑄由是  
錢貨亂敗一千錢長不盈三寸大小稱此謂之鵝眼錢劣於此者

謂之綖環錢貫之以縷入水不沈隨手破碎市井不復料數十萬  
錢不盈一掬斗米一萬商貨不行明帝初唯禁鵝眼綖環其錢皆  
通用復禁人鑄官署亦廢尋復普斷唯用古錢竣自散騎常侍丹  
陽尹加中書令表讓中書令見許時歲旱人饑竣上言禁糴一月  
息米近萬斛復代謝莊爲吏部尚書領太子右衛率未拜丁父憂  
裁踰月起爲右將軍丹陽尹如故竣固辭表十上不許遣中書舍  
人戴寶明抱竣登車載之郡舍賜以布衣一襲絮以綵綸遣主衣  
就衣諸體竣藉藩朝之舊臣每極陳得失上自卽告之後宮內頗  
有醜論又多所興造竣諫爭懇切竝無所回避上意甚不悅多不  
見從竣自謂才足幹時恩舊莫比當務居中永執朝政而所陳多  
不被納疑上欲疎之乃求出以下時旨大明元年以爲東揚州刺  
史所求旣許便憂懼無計至州又丁母艱不許去職聽送喪還都

恩待猶厚竣彌不自安每對親故頗懷怨憤又言朝廷違謬人主得失及王僧達被誅謂爲所讒構臨死陳竣前後忿懣恨言不見從僧達所言頗相符會上乃使御史中丞庾徽之奏竣窺覘國柄潛圖久執受任選曹驅扇滋甚出尹京輦形勢彌放傳詔犯憲舊須啟聞而竣以通訴忤已輒加鞭辱罔顧威靈莫此爲甚懷挾姦數包藏隱慝豫聞中旨罔不宜露罰則委上善必歸已脅懼上宰激動閭閻未慮上聞內懷猜懼僞請東牧以下天旨旣獲出藩恣詈方肆反脣腹誹方之已輕前冬母亡詔賜還葬事畢不去盤桓經時方搆間勲貴造立同異遂以已被斥外國道將顛兼行闕於家早負世議天倫怨毒親交震駭街談道說非復風聲宜加顯戮以昭盛化請以見事免竣所居官下太常削爵上上未欲便加大戮且止免官竣頻啟謝罪并乞性命上愈怒詔荅曰憲司所奏非

宿昔所以相期卿受榮遇政當極此訕訐怨憤已孤本望乃復過煩思慮懼不全立豈爲下事上誠節之至邪及竟陵王誕爲逆因此陷之言通於誕召御史中丞庾徽之於前立奏奏成詔先打折足然後於獄賜死妻息宥之以遠子辟彊徙交州又於宮亭湖沈殺之竣文集行於世竣弟測亦以文章見知官至江夏王義恭大司馬錄事參軍以兄貴爲憂先竣卒明帝卽位詔曰延之昔師訓朕躬情契兼重前記室參軍濟陽太守奠伏事蕃朝綢繆恩舊可擢爲中書侍郎奠延之第三子也

顏師伯字長深竣族兄也父邵剛正有局力爲謝晦領軍司馬晦鎮江陵請爲諮議參軍領錄事軍府之務悉委焉邵慮晦有禍求爲竟陵太守未及之郡會晦見討邵飲藥死師伯少孤貧涉獵書傳頗解聲樂弟師仲妻臧質女也質爲徐州辟師伯爲主簿孝武

爲徐州師伯仍爲輔國安北行參軍王景文時爲諮議參軍愛其  
諧敏進之孝武以爲徐州主簿善於附會大被知遇及去鎮師伯  
以主簿送故孝武鎮尋陽啟文帝請爲南中郎府主簿文帝不許  
謂典籤曰中郎府主簿那得用顏師伯孝武啟爲長流正佐帝又  
曰朝廷不能除之卿可自板然亦不宜署長流乃板爲參軍刑獄  
及討元凶轉主簿孝武踐祚以爲黃門侍郎累遷侍中大明元年  
封平都縣子親幸隆密群臣莫二多納貨賄家累千金孝武嘗與  
師伯搏菹帝擲得雉大悅謂必勝師伯後得盧帝失色師伯遽斂  
子曰幾作盧爾日師伯一輸百萬仍遷吏部尚書右軍將軍上不  
欲威權在下前後領選者唯奉行文書師伯專精獨斷奏無不可  
七年爲尚書右僕射時分置二選陳郡謝莊琅邪王曇生並爲吏  
部尚書師伯子舉周旋寒人張奇爲公車令上以奇資品不當使

兼市買丞以蔡道惠代之令史潘道栖諸道惠顏禕之元從夫任  
澹之石道兒黃難周公選等抑道惠敕使奇先到公車不施行奇  
兼市買丞事師伯坐以子預職莊曇生免官道栖道惠棄市禕之  
等六人鞭杖一百師伯尋領太子中庶子雖被黜挫愛任如初孝  
武臨崩師伯受遺詔輔幼主尚書侍中事專以委之廢帝卽位復  
還卽真加領衛尉師伯居權日久天下輻湊游其門者爵位莫不  
踰分多納貨賄家產豐積妓妾聲樂盡天下之選園池第宅冠絕  
當時驕奢淫恣爲衣冠所疾又遷尚書僕射領丹陽尹廢帝欲親  
朝政轉師伯爲左僕射以吏部尚書王景文爲右僕射奪其京尹  
又分臺任師伯至是始懼與柳元景謀廢立初師伯專斷朝事不  
與沈慶之參懷謂令史曰沈公爪牙者耳安得預政事慶之聞而  
切齒乃泄其謀尋與太宰江夏王義恭同誅六子皆見殺明帝卽

位謚曰荒

沈懷文字思明吳興武康人也祖寂晉光祿勳父宣新安太守懷文少好玄理善爲文章爲楚昭王二妃詩見稱於世爲江夏王義恭東閣祭酒丁父憂新安郡送故豐厚奉終禮畢餘悉班之親戚一無所留文帝聞而嘉之賜奴婢六人服闋除尚書殿中郎隱士雷次宗被徵居鍾山後南還廬江何尚之設祖道文義之士必集爲連句詩懷文所作尤美辭高一坐隨王誕領襄陽出爲後軍主簿與諮議參軍謝莊共掌辭令領義成太守元嘉二十八年誕嘗爲廣州欲以懷文爲安南府記室先除通直郎懷文固辭南行上不悅弟懷遠納東陽公主養女玉鸚鵡爲妾元凶行巫蠱鸚鵡預之事洩懷文因此失調爲治書侍御史元凶弒立以爲中書侍郎孝武入討呼之使作符檄固辭劾大怒會殷沖救得免託疾落馬

間行奔新亭以爲竟陵王誕驃騎錄事參軍淮陵太守時國哀未釋誕欲起內齋懷文以爲不可乃止尋轉揚州中從事史時議省錄尚書懷文以爲非宜上議不從遷別駕從事史及江夏王義恭遷西陽王子尚爲揚州居職如故時熒惑守南斗上乃廢西州舊館使子尚移居東城以厭之懷文曰天道示變宜應之以德今雖空西州恐無益也不從而西州竟廢大明二年遷尚書吏部郎時朝議欲依古制置立王畿揚州移居會稽猶以星變故也懷文曰周制封畿漢置司隸各因時宜非存相反安人定國其揆一也苟人心所安天亦從之必改今追古乃致平一神州舊壤歷代相承異於邊州或置或罷旣物情不悅容虧化本又不從三年子尚移鎮會稽遷撫軍長史行府州事時囚繫甚多動經年月懷文到任訊五郡九百三十六獄衆咸稱平入爲侍中寵待隆密竟陵王誕

南齊書卷之四十四  
據廣陵反及城陷士庶皆裸身鞭面然後加刑聚所殺人首於石頭南岸謂之髑髏山懷文陳其不可上不納孝武嘗有事圓丘未至期而雨晦竟夜明旦風霽雲色甚美帝升壇悅懷文稱慶曰昔漢后郊祀太一白日重輪神光四燭今陛下有事茲禮而膏雨迎夜清景麗朝斯寔聖明幽感所致臣願與侍臣賦之上笑稱善揚州移會稽忿浙江東人情不和欲貶其勞祿唯西州舊人不改懷文曰揚州徙居既乖人情一州兩格尤失大體上不從懷文與顏竣周朗素善竣以失旨見誅朗亦以忤意得罪上謂懷文曰竣若知我殺之亦當不敢如此懷文嘿然又嘗以歲夕與謝莊王景文顏師伯被敕入省未及進景文因談言次稱竣朗人才之美懷文與相酬和師伯後因語次白上敘景文等此言懷文屢經犯忤至此上倍不悅上又壞諸郡士族以克將吏並不服役至悉逃亡加

以嚴制不能禁乃改用軍法得便斬之莫不奔竄山湖聚爲盜賊懷文又以為言齊庫上絹年調鉅萬疋綿亦稱此期限嚴峻人間買絹一疋至三二千綿一兩三四百貧者賣妻子甚者或自縊死懷文具陳人困由是綿絹薄有所減俄復舊子尚等諸皇子皆置邸舍逐什一之利爲患徧天下懷文又曰列肆販賣古人所非卜式明不雨之由弘羊受致旱之責若以用度不克故宜量加減省不聽孝建以來抑黜諸弟廣陵平後復欲更峻其科懷文曰漢明不使其子比光武之子前史以為美談陛下既明管蔡之誅願崇唐衛之寄及海陵王休茂誅欲遂前議太宰江夏王義恭探得密旨先發議端懷文固請不可由是得息時游幸無度太后六宮常乘副車在後懷文與王景文每諫不宜亟出後因從坐松樹下風雨甚驟景文曰卿可以言矣懷文曰獨言無繼宜相與陳之江智



南史三十四  
深臥草側亦謂之善俄而被召俱入雉場懷文曰風雨如此非聖躬所宜景文又曰懷文所啟宜從智深未及有言上方注怒作色曰卿欲效顏峻耶何以恒知人事又曰顏峻小子恨不得鞭其面上每宴集在坐者咸令沈醉懷文素不飲酒又不好戲上謂故欲異已謝莊嘗誡懷文曰卿每與人異亦何可久懷文曰吾少來如此豈可一朝而變非欲異物性之所不能耳五年出爲晉安王子勛征虜長史廣陵太守明年坐朝正事畢被遣還北以女病求申臨辭又乞停三日訖猶不去爲有司所糾免官禁錮十年旣被免賣宅還東上大怒收付廷尉賜死弟懷遠爲始興王濬征北長流參軍深見親待坐納王鸚鵡爲妾孝武徙之廣州刺史宗慤欲殺之會南郡王義宣反懷遠頗閑文筆慤起義使造檄書并銜命至始興與始興相沈法系論起義事事平慤具爲陳請由此見原終

孝武世不得還前廢帝世歸位武康令撰南越志及懷文文集竝傳於世懷文三子淡深沖

沖字景綽涉獵文義仕宋歷位撫軍正佐兼記室及懷文得罪被繫沖兄弟行謝情哀貌苦見者傷之柳元景欲救懷文言於孝武曰沈懷文三子塗炭不可見願陛下速正其罪帝曰宜急殺之使其意分竟殺之元景爲之歎息沖兄弟以此知名累遷司徒錄事齊武帝爲江州沖爲征虜長史尋陽太守齊建元中累遷太子中庶子武帝在東宮待以恩舊及卽位轉御史中丞侍中永明四年爲五兵尚書沖與兄淡深名譽有優劣世號爲腰鼓兄弟淡深並歷御史中丞兄弟三人皆爲司直晉宋所未有也中丞案裁之職被惡者多結怨永明中深彈吳興太守袁彖建武中彖從弟昂爲中丞到官數日奏彈深子績父在儻白憶車免官禁錮沖母孔氏

在東隣家失火疑爲人所焚熱大呼曰我三兒皆作御史中丞與人豈有善者方恐肌分骨散何但焚如兄弟後並歷侍中武帝方欲任冲尋卒追贈太常謚曰恭子

曇慶懷文從父兄也父發員外散騎侍郎曇慶仕宋位尚書左丞時歲有水旱曇慶議立常平倉以救人急文帝納其言而事不行大明元年爲徐州刺史時殿中員外將軍裴景仁助成彭城景仁本北人多悉關中事曇慶便撰秦記十卷叙符氏事其書傳於世曇慶謹實清正所莅有稱績常謂子弟曰吾處世無才能圖作大老子耳世以長者稱之卒於祠部尚書

周朗字義利汝南安成人也父淳宋初歷位侍中太常兄嶠尚武帝第四女宣城德公主二女適建平王宏廬江王禕以貴戚顯官朗少而愛奇雅有風氣與嶠志趨不同嶠甚疾之爲江夏王義恭

太尉參軍元嘉二十七年春朝議北侵魏當遣義恭出鎮彭城爲諸軍大統朗聞之解職及義恭出鎮府主簿羊希從行與朗書戲之勸令獻奇進策朗報書援引古義辭意倜儻孝武卽位除建平王宏中軍錄事參軍時普責百官謹言朗上書陳述得失多自矜誇書奏忤旨自解去職後爲廬陵內史郡界荒蕪頗有野獸母薛氏欲見獵朗乃合圍縱火令母觀之火逸燒郡解朗悉以秩米起屋償所燒之限稱疾去官爲州司所糾還都謝孝武曰州司舉臣愆失多不允臣在郡猛獸三食人蟲鼠犯稼以此二事上負陛下上變色曰州司不允或可有之蟲獸之灾寧關卿小物朗尋丁母憂每哭必慟其餘頗不依居喪常節大明四年上使有司奏其居喪無禮詔曰朗悖禮利口宜合翦戮微物不足亂典刑特鎖付邊郡於是傳送寧州於道殺之朗族孫顥

顯字彥倫晉左光祿大夫顯七世孫也祖虎頭員外常侍父恂歸鄉相顯少爲族祖朗所知解褐海陵國侍郎益州刺史蕭惠開賞異顯攜入蜀爲厲鋒將軍帶肥鄉成都二縣令仍爲府主簿常謂惠開性太險每致諫惠開不悅荅顯曰天險地險王侯設險但問用險何如耳隨惠開還都宋明帝頗好玄理以顯有辭義引入殿內親近宿直帝所爲慘毒之事顯不敢顯諫輒誦經中因緣罪福事帝亦爲之小止元徽中詔爲剡令有恩惠百姓思之齊高帝輔政爲齊殿中郎建元初爲長沙王後軍參軍山陰令還爲文惠太子中軍錄事參軍文惠在東宮顯遷正員郎始興王前軍諮議直侍殿省深見賞遇顯音辭辯麗長於佛理著三宗論言空假義西涼州智林道人遺顯書深相贊美言捉麈尾來四十餘載頗見宗錄唯此塗白黑無一人得者爲之發病非意此音猥來入耳其論

見重如此顯於鍾山西立隱舍休沐則歸之轉太子僕兼著作撰起居注遷中書郎兼著作常游侍東宮少從外氏車騎將軍臧質家得衛恒散隸書法學之甚工文惠太子使顯書玄圃茅齋壁國子祭酒何胤以倒薤書求就顯換之顯笑荅曰天下有道丘不與易也每賓友會同顯虛席晤語辭韻如流聽者忘倦兼善老易與張融相遇輒以玄言相滯彌日不解清貧寡欲終日長蔬雖有妻子獨處山舍甚機辯衛將軍王儉謂顯曰卿山中何所食顯曰赤米白鹽綠葵紫蓼文惠太子問顯菜食何味最勝顯曰春初早韭秋末晚菘何胤亦精信佛法無妻太子又問顯卿精進何如何胤顯曰三塗八難共所未免然各有累太子曰累伊何對曰周妻何肉其言辭應變如此轉國子博士兼著作太學諸生慕其風爭事華辯始著四聲切韻行於時後卒於官子捨

捨字昇逸幼聰穎異之臨終謂曰汝不患不富貴但當將之以道德及長博學尤精義理善誦詩書音韻清辯弱冠舉秀才除太學博士從兄綿爲剡縣賊汙不少藉沒資財捨乃推宅助焉建武中魏人吳苞南歸有儒學尚書僕射江祐招苞講捨造坐折苞辭理適逸由是名爲口辯王亮爲丹陽尹聞而悅之辟爲主簿政事多委焉遷太常丞梁武帝卽位吏部尚書范雲與顒素善重捨才器言之武帝召拜尚書祠部郎禮儀損益多自捨出先是帝與諸王及吳平侯書皆云弟捨立議引武王周公故事皆曰汝從之累遷鴻臚卿時王亮得罪歸家故人莫至捨獨敦恩舊及亮卒身營殯塋時人稱之遷尚書吏部郎太子右衛率右衛將軍雖居職屢徙而常留省內罕得休下國史詔誥儀體法律軍旅謀謨皆兼掌之日夜侍上豫機密二十餘年未嘗離左右帝以爲有公輔器初

范雲卒僉以沈約久當樞管帝以約輕易不如徐勉於是勉捨同參國政勉小嫌中廢捨專掌權轄雅量不及勉而清簡過之兩人俱稱賢相時議國史疑文帝紀傳之名捨以爲帝紀之籠百事如乾象之包六爻今若追而爲紀則事無所包若直書功德則傳而非紀應於上紀之前畧有仰述從之捨占對辯捷嘗居直廬語及嗜好裴子野言從來不嘗食薑捨應聲曰孔稱不徹裴乃不嘗一坐皆悅與人論諠終日不絕而竟不言漏泄機事衆尤服之性儉素衣服器用居處牀席如布衣之貧者每人官府雖廣厦華堂閨閣重邃捨居之則塵埃滿積以荻爲障壞亦不修歷侍中太子詹事普通五年南津校尉郭祖深獲始興相白渦書餉捨衣履及婢以聞坐免官以右驍衛將軍知詹事卒上臨哭哀動左右追贈侍中護軍將軍謚曰簡子初帝銳意中原群臣咸言不可唯捨贊成

之大通中累獻捷帝思其功下詔述其德美以爲往者南司白濁  
之効恐外議謂朕有私致此黜免追愧若人一介之善外可量加  
褒異以旌善人捨集二十卷二子弘義弘信弟子弘正

弘正字思行父寶始梁司徒祭酒弘正幼孤及弟弘讓弘直俱爲  
伯父捨所養年十歲通老子周易捨每與談論輒異之曰觀汝青  
理警發後世知名當出吾右河東裴子野深相賞納請以女妻之  
十五召補國子生仍於國學講易諸生傳習其義以季春入學孟  
冬應舉學司以日淺不許博士到洽曰周郎弱冠講經豈俟策試  
普通中初置司文義郎直壽光省以弘正爲司義侍郎弘正醜而  
不陋吃而能談誹諧似優剛腸似直善玄理爲當世所宗藏法師  
於開善寺講說門徒數百弘正年少未知名著紅禪錦紋髻踞門  
而聽衆人蔑之弗譴也旣而乘間進難舉坐盡傾法師疑非世人

覘知大相賞狎劉顯將之尋陽朝賢畢祖道顯縣帛十匹約曰險  
衣來者以賞之衆人競改常服不過長短之間顯曰將有甚於此  
矣旣而弘正綠絲布袴繡假種軒昂而至折標取帛大通三年昭  
明太子薨其嗣華容公不得立乃以晉安王綱爲皇太子弘正奏  
記請抗目夷上仁之義執子臧之節其抗直守正如此常自稱有  
才無相僕射徐勉掌選以其陋不堪爲尚書郎乃獻書於勉其言  
甚切稍遷國子博士學中有宋元凶講孝經碑歷代不改弘正始  
到官卽表刊除時於城西立士林館弘正居以講授聽者傾朝野  
焉弘正啓周易疑義凡五十條又請釋乾三二繫復詔荅之後爲  
平西邵陵王府諮議參軍有罪應流徙敕以賜干陞利國未去寄  
繫尚方於獄上武帝講武詩降敕原罪仍復本位弘正博物知玄  
象善占候大同末嘗謂弟弘讓曰國家阨在數年當有兵起吾與

汝不知何所逃之及武帝納侯景弘正謂弘讓曰亂階此矣臺城陷弘正諂附王偉又與周石珍合族避景諱改姓姬氏拜太常景將篡之際使掌禮儀及王僧辯東討元帝謂僧辯曰王師近次朝士孰當先來王僧辯曰其周弘正乎弘正智不後機體能濟勝無妻子之顧有獨決之明其餘碌碌不逮也俄而前部傳云弘正至僧辯飛騎迎之及見歡甚曰吾固知王僧達非後機者公可坐吾膝上對曰可謂進而若將加諸膝老夫何足以當僧辯即日啟元帝手書與弘正仍遣使迎之謂朝士曰晉氏平吳喜獲二陸今我討賊亦得兩周及至禮數甚優朝臣無比授黃門侍郎直侍中省俄遷左戶尚書加散騎常侍夏月著犢鼻禪衣朱衣爲有司所彈其作達如此元帝常著金樓子曰余於諸僧重招提琰法師隱士重華陽陶貞白士大夫重汝南周弘正其於義理情轉無窮亦一

時之名士也弘正善清談梁末爲玄宗之冠及侯景平僧辯啟送秘府圖籍敕弘正讐校時朝議遷都但元帝再臨荆陝前後二十餘年情所安戀不欲歸建鄴兼故府臣僚皆楚人並欲卽都江陵云建康蓋是舊都彫荒已極且王氣已盡兼與北止隔一江若不虞悔無所及且臣等又聞荆南有天子氣今其應矣元帝無去意時尚書左僕射王褒及弘正咸侍帝顧曰卿意何如褒等以帝猜忌弗敢衆中公言唯唯而已褒後因清間密諫還丹陽甚切帝雖納之色不悅及明日衆中謂褒曰卿昨勸還建鄴不爲無理吾昨夜思之猶懷疑惑褒知不引納乃止他日弘正乃正色諫至于再三曰若如士大夫唯聖王所都本無定處至如黔首未見入建鄴城便謂未是天子猶列國諸王今日赴百姓之心不可不歸建鄴當時頗相酬許弘正退後黃羅漢宗懔乃言弘正王褒並東人

仰勸東下非爲國計弘正竊知其言他日乃復上前面折二人曰  
若東人勸下東謂之私計西人勸住西亦是私計不衆人默然而  
人情竝勸遷都上又曾以後堂大集文武其預會者四五百人帝  
欲徧試人情曰勸吾去者左袒於是左袒者過半武昌太守朱買  
臣上舊左右而闡人也頗有幹用故上擢之及是勸上遷曰買臣  
家在荊州豈不願官長住但恐是買臣富貴非官富貴邪上深感  
其言卒不能用及魏平江陵弘正遁歸建鄴太平元年授侍中領  
國子祭酒遷太常卿都官尚書陳武帝授太子詹事天嘉元年遷  
侍中國子祭酒往長安迎宣帝二年自周還廢帝嗣位領都官尚  
書總知五禮事宣帝卽位遷特進領國子祭酒加扶太建二年授  
尚書右僕射尋敕侍東宮講論語孝經太子以弘正德望素重有  
師資之敬焉弘正特善玄言兼明釋典雖碩德名僧莫不請質疑

滯六年卒官年七十九贈侍中中書監謚曰簡子所著周易講疏  
十六卷論語疏十一卷莊子疏八卷老子疏五卷孝經疏二卷集  
二十卷行于代子豫玄年十四與俱載入東乘小船度岸見藤花  
弘正挽之船覆俱溺弘正僅免豫玄遂得心驚疾次子墳尚書吏  
部郎

弘讓性簡素博學多通始仕不得志隱於句容之茅山頻徵不出  
晚仕侯景爲中書侍郎人問其故對曰昔王道正直得以禮進退  
今乾以易位不至將害於人吾畏死耳始彭城劉孝先亦辭辟命  
隨兄孝勝在蜀武陵建號仕爲世子府諮議參軍二隱竝獲譏於  
代弘讓承聖初爲國子祭酒二年爲仁威將軍城句容以居之命  
曰仁威壘陳天嘉初以白衣領太常卿光祿大夫加金章紫綬  
弘讓弟弘直字思方幼而聰敏仕梁爲西中郎湘東王外兵記室

參軍與東海鮑泉南陽宗慄平原陸綬沛國劉毅同掌書記王出  
鎮江荆二州累除諮議參軍及承制封湘賓縣侯累遷昌州刺史  
王琳之舉兵弘直在湘州琳敗乃入陳位太常卿光祿大夫加金  
章紫綬弘直方雅敦厚氣調高於次昆或問三周孰賢人曰若蜂  
腰矣太建七年卒遺疏氣絕之後便買市中見材小形者斂以時  
服古人通制但下見先人必須備禮可著單衣裙衫故履既應侍  
養宜備紛悅或逢善友又須香煙棺內唯安白布手中麤香鑪而  
已此外無所用卒於家年七十六有文集二十卷子確字士潛美  
容儀寬大有行檢博涉經史篤好玄言位都官尚書禎明初卒  
論曰文人不護細行古今之所同焉由夫聲裁所知故取忤於人  
者也觀夫顏謝之於宋朝非不名高一代靈運既以取斃延之亦  
躋當年向之所謂貴身翻成害己者矣士遜援筆數罪陵讎犯難

餌彼慈親再之獸吻以此爲忠無聞前誥夫自忍其親必將忍人  
之親士遜自忘其孝期以申人之孝自非嚴父之辭允而義愜則  
難乎免矣師伯行已縱欲好進忘退既以此始亦以此終宜乎懷  
文蹈履之地足以追蹤古烈孔母致懼中丞其誠深矣周朗始終  
之節亦侔儻爲尤顯捨父子文雅不墜弘正兄弟義業幾乎德門  
者焉



南史卷三十四

列傳二十四終

華川中鳳園  
氏閣南南甫

南史卷三十五

列傳第二十五

華川中鳳園  
氏閣南南甫

劉湛

庾悅

族弟登之

仲文

仲文子弘遠

仲文族孫仲容

顧琛

顧覲

孫憲之

劉湛字弘仁南陽涅陽人也祖耽父柳竝晉左光祿大夫開府儀  
同三司湛出繼伯父淡襲封安衆縣五等男少有局力不尚浮華  
博涉史一作經傳諳前代舊典弱年便有宰物情常自比管葛不為文章  
不喜談議除宋武帝太尉行參軍賞遇甚厚父柳亡於江州府州  
送故甚豐一無所受時論稱之服闋為相國參軍謝晦王弘竝稱  
其器幹武帝入受晉命以第四子義康為冠軍將軍豫州刺史留

鎮壽陽以湛爲長史梁郡太守義康弱年未親政府州事悉委湛  
進號右將軍仍隨府轉義康以本號徙南豫州湛改領歷陽太守  
爲人剛嚴用法姦吏犯贓百錢以上皆殺之自下莫不震肅廬陵  
王義真出爲車騎將軍南豫州刺史湛又爲長史太守如故義真  
時居武帝憂使帳下備膳湛禁之義真乃使左右人買魚肉珍羞  
於齋內別立厨帳會湛入因命膳酒炙車螯湛正色曰公當今不  
宜有此設義真曰且甚寒杯酒亦何傷長史事同一家望不爲異  
酒至湛起曰旣不能以禮自處又不能以禮處人後爲廣州刺史  
嫡母憂去職服闋爲侍中時王華王曇首殷景仁亦爲侍中文帝  
於合殿與四人宴飲甚悅華等出帝目送良久歎曰此四賢一時  
之秀同管喉脣恐後世難繼及撫軍將軍江夏王義恭鎮江陵以  
湛爲使持節南蠻校尉領撫軍長史行府事王弘輔政而王華王

曇首任事居中湛自謂才能不後之不願外出是行也謂爲弘等  
所斥意甚不平常曰二王若非代邸之舊無以至此可謂遭遇風  
雲湛負其才氣常慕汲黯崔琰爲人故名長子曰黯字長孺第二  
子曰琰字季珪母於江陵病卒湛求自送喪還都義恭亦爲之陳  
請文帝荅義恭曰吾亦得湛故事爲之酸懷乃不欲苟違所請但  
汝弱年新涉軍務八州殷曠專斷事重疇諮委杖不可不得其人  
量算二三未獲便相順許今荅湛啟權停彼葬頃朝臣零落相係  
寄懷轉寡湛寔國器吾乃欲引其令還直以西夏任重要且停此  
事耳汝慶賞黜罰預得失者必宜悉相委寄義恭性甚狷隘年又  
漸大欲專政事每爲湛所裁主佑之間嫌隙遂構文帝聞之密遣  
詰讓義恭義恭陳湛無居下之禮又自以年長未得行意雖奉詔  
旨每出怨言上友于素篤欲加酬順乃詔之曰當今之才委授已

爾宜盡相彌縫取其可取棄其可棄先是王華既亡曇首又卒領軍將軍殷景仁以時賢零落白文帝徵湛八年召爲太子詹事加給事中與景仁竝被任遇湛云今代宰相何難此正可當我南陽郡漢代功曹耳明年景仁轉尚書僕射領選護軍將軍湛代爲領軍十二年又領詹事湛與景仁素款又以其建議徵之甚相感悅及俱被時遇猜隙漸生以景仁專內任謂爲間已時彭城王義康專執朝權而湛昔爲上佐遂以舊情委心自結欲因宰相之力回主心傾黜景仁獨當時務義康屢言之於文帝其事不行義康僚屬及湛諸附隸潛相約勒無敢歷殷氏門者湛黨劉敬文父成未悟其機詣景仁求郡敬文遽謝湛曰老父悖耄遂就殷鐵干祿由敬文闇淺上負生成合門慙懼無地自處敬文之姦諂如此義康擅權專朝威傾內外湛愈推崇之無復人臣之禮上稍不能平湛

初入朝委任甚重善論政道并諳前代故事聽者忘疲每入雲龍門御者便解駕左右及羽儀隨意分散不夕不出以此爲常及晚節驅煽義康陵轢朝廷上意雖內離而接遇不改上謂所親曰劉斑初自西還吾與語常看日早晚慮其當去比入亦看日早晚慮其不去湛小字斑獸故云斑也遷丹陽尹詹事如故十七年所生母亡上與義康形迹旣乖豐難將結湛亦知無復金地及至丁艱謂所親曰今年必敗常日賴口舌爭之故得推遷耳今旣窮毒無復此望禍至其能久矣伏甲於室以待上臨弔謀又泄竟弗之幸十日詔收付廷尉於獄伏誅時年四十九黠等從誅弟素黃門郎徙廣州湛初被收歎曰便是亂邪又曰不言無戎應亂殺我曰自是亂法耳入獄見素曰乃復及汝邪相勸爲惡惡不可爲相勸爲善正見今日如何湛生女輒殺之爲時流所怪

庾悅字仲豫潁川陽陵人也晉太尉亮之曾孫也祖義吳國內史父淮西中郎將豫州刺史悅仕晉爲司徒右長史桓玄篡位爲中書侍郎宋武平建鄴累遷建威將軍江州刺史加都督初劉毅家在京口酷貧嘗與鄉曲士大夫往東堂共射時悅爲司徒右長史要府州僚佐出東堂毅已先至遣與悅相聞曰身竝貧躋營一遊甚難君如意人無處不可爲適豈不能以此堂見讓悅素豪徑前不荅毅時衆人竝避唯毅留射如故悅厨饌甚盛不以及毅毅旣不去悅甚不歡毅又相聞曰身今年未得子鵝豈能以殘炙見惠悅又不荅至是毅表解悅都督將軍官以刺史移鎮豫章以親將趙恢領千兵守尋陽建威府文武三千人悉入毅將府深相挫辱悅不得志疽發背到豫章少日卒

登之字元龍悅族弟也曾祖冰晉司空祖蘊廣州刺史父廓東陽

太守登之少以疆濟自立初爲宋武帝鎮軍參軍預討桓玄功封曲江縣五等男累遷新安太守謝晦爲荊州刺史請爲長史南郡太守仍爲衛軍長史登之與晦俱曹氏壻名位本同一旦爲之佐意甚不愜到廳牋唯言即日恭到初無感謝之言每入覲見備持箱囊几席之屬一物不具則不肯坐嘗於晦坐誦西征賦云生有脩短之命位有通塞之遇晦雖恨而嘗優容之晦拒王師欲登之留守登之不許晦敗登之以無任免官禁錮還家何承天戲之曰因禍爲福未必皆知登之曰我亦幾與三豎同戮承天爲晦作表云當浮舟東下戮此三豎故登之爲嘲後爲司徒長史南東海太守府公彭城王義康專覽政事不欲自下厝意而登之性剛每陳已志義康不悅出爲吳郡太守以贓貨免官後拜豫章太守徵爲中護軍未拜卒子仲遠初爲宋明帝府佐廢帝景和中明帝疑防賓

客故人無到門者唯仲遠朝謁不替明帝卽位謂曰卿所謂疾風知勁草自軍錄事參軍擢拜太子中庶子卒於豫章太守贈侍中登之弟仲文

仲文位廣平太守兄登之爲謝晦長史仲文往省之時晦權重朝士竝加敬仲文獨與抗禮後爲彭城王義康驃騎主簿未就徙爲丹陽丞旣未到府疑於府公禮敬下禮官博議中書侍郎裴松之議曰案春秋桓公八年祭公逆王后于紀公羊傳曰女在國稱女此其稱王后何王者無外其辭成矣推此而言則仲文爲吏之道定於受敕之日矣名器旣正則禮亦從之安可以未到廢其節乎宜執吏禮從之後始興王濬當鎮湘州以仲文爲司馬濬不之任仍除南梁太守司馬如故于時領軍劉湛協附大將軍彭城王義康而與僕射殷景仁隙凡朝士遊殷氏者不得入劉氏之門獨仲文

遊二人間密盡忠於朝廷景仁稱疾不朝見者歷年文帝常令仲文銜命去來湛不疑也義康出藩湛伏誅以仲文爲尚書吏部郎與右衛將軍沈演之俱參機密歷侍中吏部尚書領義陽王師內外歸附勢傾朝野仲文爲人強急不耐煩賓客訴非理者忿罵形於辭色素無術學不爲衆望所推性好潔士大夫造之者未出戶輒令人拭席洗牀時陳郡殷冲亦好淨小史非淨浴新衣不得近左右士大夫小不整潔每容接之仲文好潔反是每以此見譏領選旣不緝衆論又頗通貨賄用少府卿劉道錫爲廣州刺史道錫至鎮餉白檀牽車常自乘焉或以白文帝帝見問曰道錫餉卿小車裝飾甚麗有之乎仲文懼起謝又仲文請急還家吏部令史錢泰主客令史周伯齊出仲文宅諮事泰能彈琵琶伯齊善歌仲文因留停宿尚書制令史諮事不得宿停外雖八座命亦不許爲有

司所奏上於仲文素厚將恕之召問尚書右僕射何尚之具陳仲文得失奏言仲文事如丘山若縱而不糾復何以爲政晉武不爲明主斷鬲令史遂能奮發華廙見待不輕廢錮累年後起改作城門校尉耳若言仲文有誠於國未知的是何事政當云與殷景仁不失其舊與劉湛亦復不疎且景仁當時意事豈復可廢縱有微誠復何足掩其惡今賈克勳烈晉之重臣雖事業不稱不聞有大罪諸臣進說便卽遠出陛下聖叡反更遲遲於此仲文身上之豐旣自過於范曄所少賊一事耳伏願深加三思試以諸聲傳普訪諸可顧問者群下見陛下顧遇旣重恐不敢苦侵傷顧問之日宜布嫌責之旨若不如亦當不辯有所得失時仲文自理不諳臺制令史竝言停外非嫌帝以小事不足傷大臣尚之又陳令史具向仲文說不得停之意仲文了不聽納非爲不解直是苟相留耳

雖是令史出乃遠虧朝典又不得謂之小事謝晦望實非今者之疇一事錯誤免侍中官王珣時賢少失桓胤春蒐之謬皆白衣領職况公犯憲制邪孔萬祀居左局言仲文貴要異他尚書令又云不癡不聾不成姑公敢作此言亦爲異也文帝猶優遊使尚之更陳其意尚之備言仲文愆曰臣思張遼之言關羽雖兄弟曹公父子豈得不言觀今人臣憂國甚寡臣復結舌日月之明或有所蔽然不知臣者豈不謂臣有爭競之心亦追以悵悵臣與仲文周旋俱被恩接不宜復生厚薄太尉昨與臣言說仲文有諸不可非唯一條遠近相崇畏震動四海仲文先與劉德願殊惡德願自持琵琶甚精麗遺之便復款然市令盛馥進數百口材助營宅恐人知作虛買券劉道錫驟有所輸傾南俸之半劉雍自謂其力助事之如父夏中送甘蔗若新發於州國吏運載樵蘇無輟於道諸見人

有物鮮或不求聞劉遵考有材便乞材見好燭繁便復乞之選用  
不平不可二太尉又言仲文都無共事之體凡所選舉悉是其意  
政令太尉知耳論虞秀一有之黃門太尉不正荅和故得停太尉近  
與仲文疏欲用德願兒作州西曹仲文乃啓用爲主簿卽語德願  
以謝太尉前後漏泄竇恩亦復何極縱不罪故宜出之自從裴劉  
刑罰已來諸將陳力百倍今日事實好惡可問若赫然發憤顯明  
法憲陛下便可閑卧紫闥無復一事也帝欲出仲文爲丹陽又以  
問尚之荅言仲文蹈罪負恩陛下遲遲舊恩未忍窮法方復有尹京  
赫赫之授恐悉心奉國之人於此而息貪狼恣意歲月滋甚如臣  
所聞天下議論仲文恒塵累日月未見一毫增輝乃更成形成勢是  
老王雅也古人言無賞罰雖堯舜不能爲政陛下豈可坐損皇家  
之重迷一凡夫令賈誼劉向重生豈不慷慨流涕於聖世邪臣昔

啟范擘當時亦懼犯觸之尤苟是愚懷所挹政自不能不舒達所  
謂雖九死而不悔也臣謂仲文且外出若能脩改在職著稱還亦  
不難而得少明國典粗酬四海之誚今愆豐如山榮任不損仲文  
若復有彰大之罪誰敢以聞亦知陛下不能採臣之言故是臣不  
能以已之意耳又曰臣見劉伯龍大慷慨仲文所行言有人送張  
幼緒語人吾雖得一縣負錢三十萬庾仲遠作嘗送至新林見縛  
束猶未得解手荀萬秋嘗詣仲文逢一客姓夏侯主人問有好牛  
不言無問有好馬不又言無政有佳驢耳仲文便荅甚是所欲客  
出門遂相聞索之劉道錫言仲文所舉就道錫索嫁女具及祠器  
乃當百萬數猶謂不然選令史章龍向臣說亦歎其受納之過言  
實得嫁女銅鑪四人舉乃勝細葛斗帳等物不可稱數在尚書中  
令奴酤酒利其百十亦是立臺閣所無不審少簡聖聽不帝乃

可有司之奏免仲文官卒于家帝錄其宿誠追贈本官子弘遠  
弘遠字士操清實有士譽仕齊爲江州長史刺史陳顯達舉兵敗  
斬於朱雀航將刑索帽著之曰子路結纓吾不可以不冠而死請  
看者曰吾非賊乃是義兵爲諸君請命耳陳公太輕事若用吾言  
天下將免塗炭弘遠子子曜年十四抱持父乞代命遂併殺之仲  
文從弟徽之位御史中丞徽之子漪齊邵陵王記室漪子仲容  
仲容字子仲幼孤爲叔父泳所養及長杜絕人事專精篤學晝夜  
手不輟卷初爲安西法曹行參軍泳時貴顯吏部尚書徐勉擬泳  
子晏嬰爲宮僚泳泣曰兄子幼孤人才粗可願以晏嬰所忝回用  
之勉許焉轉仲容爲太子舍人遷安成王主簿時平原劉峻亦爲  
府佐竝以強學王所禮接後爲永康錢唐武康令竝無績多被推  
劾久之除安成王中記室當出隨府皇太子以舊恩降餞賜詩曰

孫生陟陽道吳子朝歌縣未若樊林舉置酒臨華殿時輩榮之後  
爲尚書左丞坐推糺不直免官仲容博學少有盛名頗任氣使酒  
好危言高論士友以此少之唯與王籍謝幾卿情好相得二人時  
亦不調遂相追隨誕縱酣飲不持檢操遇太清亂遊會稽卒仲容  
抄子書三十卷諸集三十卷衆家地理書二十卷列女傳三卷文  
集二十卷竝行於代

顧琛字弘瑋吳郡吳人晉司空和之曾孫也祖履之父倓竝爲司  
徒左西曹掾琛謹確不尚浮華起家州從事駙馬都尉累遷尚書  
庫部郎元嘉七年文帝遣到彥之經畧河南大敗悉委棄兵甲武  
庫爲之空虛文帝宴會有歸化人在座上問琛庫中仗猶有幾許  
琛詭辭荅有十萬人仗舊庫仗秘不言多少上旣發問追悔失言  
及琛詭對上甚善之尚書等門有制八坐以下門生隨入者各有



差不得雜以人士琛以宗人顧碩寄尚書張茂度門名而與顧碩同席坐明年坐譴出免中正凡尚書官大罪則免小罪譴出譴出者百日無代人聽還本職琛仍爲彭城王義康所請再補司徒錄事參軍十五年出爲義興太守初義康請琛入府欲委以腹心琛不能承事劉湛故尋見斥外十九年徙東陽太守欲使琛防守彭城王義康固辭忤旨廢黜還家積年及元凶弒立分會稽五郡置州以隨王誕爲刺史卽以琛爲會稽太守誕起義加冠軍將軍事平遷吳興太守孝建元年爲吳郡太守以起義功封永新縣五等侯大明元年吳縣令張闔坐居母喪無禮下廷尉錢唐令沈文秀判劾違謬應坐被彈琛宣言於衆闔被劾之始屢相申明又云當啟文秀留縣孝武聞之大怒謂琛賣惡歸上免官琛母老仍停家琛及前西陽太守張牧並事司空竟陵王誕誕反遣客陸延稔齋

書板琛及子弟官時孝武以琛素結事誕或有異志遣信就吳郡太守王曇生誅琛父子會延稔先至琛等卽執斬之遣二子送延稔首啟聞孝武所遣誅琛使其日亦至而獲免琛母孔氏時年百餘歲晉安帝隆安初琅邪王廞於吳中作亂以爲貞烈將軍悉以女人爲官屬以孔氏爲司馬及孫恩亂後東土飢荒人相食孔氏散家糧以賑邑里得活者甚衆生子皆以孔爲名焉琛仍爲吳興太守明年坐郡人多翦錢及盜鑄免官歷位都官尚書廢帝卽位爲吳郡太守初琛景平中爲朝請假還東日晚至方山于時商旅數十船悉泊岸側有一人玄衣介幘執鞭屏諸船云顧吳郡部伍尋至應泊此岸於是諸船各東西俄有一假裝至事力甚寡仍泊向處人問顧吳郡早晚至船人荅無顧吳郡又問何船曰顧朝請耳莫不驚怪琛意竊知爲善徵因誓之曰若得郡當於此立廟至

是果爲吳郡乃立廟方山號白馬廟云明帝泰始初與四方同反  
兵敗奉母奔會稽臺軍旣至歸降後爲員外常侍中散大夫卒次  
子寶先大明中爲尚書水部郎先是琛爲左丞荀萬秋所劾及寶  
先爲郎萬秋猶在職自陳不拜孝武詔曰敕違糾慢憲司之職若  
有不公自當更有釐改而自頃劾無輕重輒致私絕此風難長主  
者嚴爲其科先是宋世江東貴達者會稽孔季恭子靈符吳興丘  
深之及琛吳音不變深之字思玄吳興烏程人位侍中都官尚書  
卒於太常

顧覲之字偉仁吳郡吳人也高祖謙字公讓晉平原內史陸機姊  
夫祖崇大司農父黃老司徒左西曹掾覲之爲謝晦衛軍參軍晦  
愛其雅素深相知待歷位尚書都官郎殷劉隙著覲之不欲與殷  
景仁久接乃辭脚疾免歸每夜常於床上行脚家人竊異之而莫

曉其意及義康徙廢朝廷多受禍覲之竟免後爲山陰令山陰劇  
邑三萬戶前後官長晝夜不得休事猶不舉覲之御繁以約縣用  
無事晝日垂簾門階閑寂自宋世爲山陰務簡而事理莫能尚也  
後爲尚書吏部郎嘗於文帝坐論江東人物言及顧榮袁淑謂覲  
之曰卿南人怯懦豈辦作賊覲之正色曰卿乃復以忠義笑人淑  
有愧色孝建中爲湘州刺史以政績稱大明元年徵守度支尚書  
轉吏部尚書時沛郡相縣唐賜往比村彭家飲酒還因得病吐蠱  
二十餘物賜妻張從賜臨終言死後親剝腹五藏悉糜碎郡縣以  
張忍行剝割賜子副又不禁止論妻傷夫五歲刑子不孝母子棄  
市竝非科例三公郎劉勰議賜妻痛往遵言兒識謝及理考事原  
心非在忍害謂宜哀矜覲之議以妻子而行忍酷不宜曲通小情  
謂副爲不孝張同不道詔如覲之議後爲吳郡太守幸臣戴法興

南史三十五  
權傾人主而覬之未嘗低意左光祿大夫蔡興宗與覬之善嫌其風節過峻覬之曰辛毗有云孫劉不過使吾不為三公耳後卒於湘州刺史謚曰簡子覬之家門雍穆為州郡所重子綽私財甚豐鄉里士庶多負責覬之禁不能止及後為吳郡誘出文券一大厨悉令焚之宣語遠近皆不須還綽懊歎彌日覬之常執命有定分非智力所移唯應恭已守道信天任運而闇者不達妄意徼倖徒虧雅道無關得喪乃以其意命弟子愿作定命論愿字子恭父深之散騎侍郎愿好學有才辭卒於太子舍人覬之孫憲之

憲之字士思性允清直宋元徽中為建康令時有盜牛者與本主爭牛各稱已物二家辭證等前後令莫能決憲之至覆其狀乃令解牛任其所去牛徑還本宅盜者始伏其罪時人號曰神明至於權要請托長吏貧殘據法直繩無所阿縱性又清儉強力為政甚

得人和故都下飲酒者醇旨輒號為顧建康謂其清且美焉仕齊為衡陽內史先是郡境連歲疾疫死者大半棺槨尤貴悉裹以葦席棄之路傍憲之下車分告屬縣求其親黨悉令殯葬其家人絕滅者憲之出公祿使紀綱營護之又土俗山人有病輒云先亡為禍皆開冢剖棺水洗枯骨名為除祟憲之曉喻為陳生死之別事不相由風俗遂改時刺史王奐初至唯衡陽獨無訟者乃歎曰顧衡陽之化至矣若九郡率然吾將何事後為東中郎長史行會稽郡事山陰人呂文度有寵於齊武帝於餘姚立邸頗縱橫憲之至郡即日除之文度後還葬郡縣爭赴弔憲之不與相聞文度甚銜之亦卒不能傷也時西陵戍主杜元懿以吳興歲儉會稽年登商旅往來倍歲西陵牛埭稅官格日三千五百求加至一倍計年長百萬浦陽南北津及柳浦四埭乞為官領攝一年格外長四百許

萬武帝以示會稽使陳得失憲之議曰尋始立牛埭非苟通餽以  
納稅也當以風濤迅險人力不捷濟急以利物耳既公私是樂故  
輸直無怨京師航渡卽其例也而後之監領各務已功或禁遏別  
道人生理外凡如此類不經埭煩牛者上詳被報蒙停格外十條  
從來喧訴始得暫弭案吳興頻歲失稔今茲尤饑去乏從豐良由  
飢棘舊格新減尚未議登格外加倍將以何術皇慈恤隱振廩蠲  
調而元懿幸災權利重增困瘼人而不仁古今共疾且比見加格  
置市者前後相屬非唯新加無贏並皆舊格有闕愚恐元懿今啓  
亦當不殊若事不副言懼貽譴詰便百方侵苦爲公賈怨其所欲  
舉腹心亦當獸而冠耳書云與其有聚斂之臣寧有盜臣言盜公  
爲損益微人一作所害乃大也然掌斯任者應簡廉平則無害於人愚  
又以便宜者蓋謂便於公宜於人也竊見頃之言便宜者非能於

人力之外用天分地者也率皆卽日不宜於人方來未便於公名  
與實反有乖政體凡如此等誠宜深察山陰一縣課戶二萬其人  
貲不滿三千者殆將居半刻又刻之猶且三分餘一凡有貲者多  
是士人復除其貧極者悉皆露戶役人三五屬官竝惟正百端輸  
調又則常然皆衆局檢校首尾尋續橫相質累者亦復不少一人  
被攝十人相追一緒裁萌千孽互起蠶事弛而農業廢賤取庸而  
貴舉責應公贍私日不暇給欲無爲非其可得乎死且不憚矧伊  
刑罰身且不愛何況妻子是以前檢未窮後巧復滋網辟徒峻猶  
不能悛竊尋人之多僞實由宋季軍旅繁興役賦殷重不堪勤劇  
奇巧所優積習生常遂迷忘反四海之大庶黎之衆心用參差難  
卒澄之一作化宜以漸不可疾責誠存不擾藏疾納沔務詳寬簡則稍  
自歸淳又被簡符前後累千符旨既嚴不敢聞信縣簡送郡郡簡

呈使殊形詭狀千變萬源聞者忽不經懷見殊刑者實足傷駭兼親屬里伍流離道路時轉窮涸事方未已其士人婦女彌難厝衷不簡則疑其有巧欲簡復未知所安愚謂此條宜委縣保舉其綱領略其毛目乃當有漏不出貯中庶嬰疾沉痼者重荷生造之恩也又永興諸暨離唐寓寇擾公私殊燼彌復特甚儻逢水旱實不易思俗諺云會稽打鼓送恤吳興步擔令史會稽舊稱沃壤今猶若此吳興本是堵土事在可知因循餘弊誠宜改張武帝並從之由是深以方直見知遷南中郎巴陵王長史南兗南豫二州事典籤諮事未嘗接以顏色動遵法制時司徒竟陵王於宣城臨城定陵三縣界立屯封山澤數百里禁人樵採憲之固陳不可言甚切直王曰非君無以聞此德音卽命罷屯禁遷給事黃門兼尚書吏部郎中宋時其祖覬之嘗爲吏部於庭列植嘉樹謂人曰吾爲憲

之植耳至是憲之果爲此職永明中爲豫章內史在任清簡務存寬惠有貞婦萬晞者少孀居無子事舅姑尤孝父母欲奪而嫁之誓死不許憲之賜以束帛表其節義梁武帝平建鄴爲揚州牧徵憲之爲別駕從事史比至而已受禪憲之風疾漸篤因求還吳就加太中大夫憲之雖累經宰郡資無儋石及歸環堵不免飢寒天監八年卒於家臨終爲制敕其子曰夫出生入死理均晝夜生旣不知所從死亦安識所往延陵云精氣上歸于天骨肉下歸於地魂氣則無所不之良有以也雖復茫昧難徵要若非妄百年之期迅若馳隙吾今預爲終制瞑目之後念竝遵行勿違吾志也莊周澹臺達生者也王孫士安矯俗者也吾進不及達還無所矯常謂中都之制允理愜情衣周於身示不違禮棺周於衣足以蔽臭入棺之物一無所須載以輜車覆以麤布爲使人勿惡也漢明帝天

子之尊猶祭以杆水脯糗范史雲烈士之高亦莫以寒水乾飯況  
吾卑庸之人其可不節衷也喪易寧感自是親親之情禮奢寧儉  
差可得由吾意不須常施靈筵可止設香燈使致哀者有憑耳朔  
望祥忌可權安小牀暨施几席唯下素饌勿用牲牢蒸嘗之祠貴  
賤罔替備物難辦多致疎怠祠先自有舊典不可有闕自吾已下  
止用蔬食時果勿同於上世示令子孫四時不忘其親耳孔子云  
雖菜羹瓜祭必齋如者本貴誠敬豈求備物哉所著詩賦銘讚并  
衡陽郡記數十篇

論曰古人云利令智昏甚矣利害之相傾也劉湛識用才能寔包  
經國之略豈知移弟爲臣則君臣之道變用兄成主則兄弟之義  
殊而執數懷姦苟相宗悅與夫推長戟而犯順何以異哉昔華元  
敗則以羊羹而取禍觀夫庾悅亦鵝炙以速尤乾餱以愆斯相類  
矣登之因禍而福倚伏無常仲文賄而爲災乃徇財之過也  
吳郡徵兆於初筮覲之清白之迹見於暮年憲之莅政所在稱  
時移三代一德無虧求之古人未爲易遇觀其遺命可謂有始  
卒者矣

南史卷三十五 列傳第二十五 終

華川中鳳書  
氏蘭南甫

南史卷三十六  
列傳第二十六

華川中鳳書  
氏蘭南甫

羊欣

羊玄保

沈演之

江夷

羊欣字敬元泰山南城人也曾祖忱晉徐州刺史祖權黃門郎父不疑桂陽太守欣少靖默無競於人美言笑善容止泛覽經籍尤長隸書父不疑為烏程令欣年十二時王獻之為吳興太守甚知愛之欣嘗夏月著新絹裙晝寢獻之入縣見之書裙數幅而去欣書本工因此彌善起家輔國參軍府解還家隆安中朝廷漸亂欣

子戎 兄子希

祖勁 兄孫顛 演之從子憲 憲孫浚

子湛 曾孫敦 玄孫倩 祿 五世孫紆 六世孫撫 夷弟子智深

子謚

續後漢書

優遊私門不復進仕會稽王世子元顯每使書扇常不奉命元顯怒乃以爲其後軍府舍人此職本用寒人欣意貌恬然不以高卑見色論者稱焉嘗詣領軍謝混混拂席改服然後見之時混族子靈運在坐退告族兄瞻曰望蔡見羊欣遂改席易衣欣由此益知名桓玄輔政以欣爲平西主簿參豫機要欣欲自疎時漏密事玄覺其此意愈更重之以爲楚臺殿中郎謂曰尚書政事之本殿中禮樂所出卿昔處股肱方此爲輕欣就職少日稱病自免屏居里巷十餘年義熙中弟徽被知於武帝帝謂諮議參軍鄭鮮之曰羊徽一時美器世論猶在兄後卽板欣補右軍劉蕃司馬後爲新安太守在郡四年簡惠著稱除臨川王義慶輔國長史廬陵王義真車騎諮議參軍並不就文帝重以爲新安太守在郡十三年樂其山水嘗爲子弟曰人生仕宦至二千石斯可矣及是便懷止足轉

義興太守非其好也頃之稱病篤免歸除中散大夫素好黃老常手自書章有病不服藥飲符水而已兼善醫術撰藥方數十卷欣以不堪拜伏辭不朝覲自非尋省近親不妄行詣行必由城外未嘗入六門武帝文帝並恨不識之元嘉十九年卒弟徽字敬猷時譽多欣位河南太守卒

羊玄保太山南城人也祖楷晉尚書都官郎父綏中書侍郎玄保初爲宋武帝鎮軍參軍少帝景平中累遷司徒右長史府公王弘甚知重之謂左長史庾登之吏部尚書王淮之曰卿二賢明美朗詣會悟多通然弘懿之望故當共推羊也頃之入爲黃門侍郎善弈棊品弟三文帝亦好弈與賭郡玄保戲勝以補宣城太守先是劉式之爲宣城立吏人亡叛制一人不禽符伍里吏送州作部能禽者賞位二階玄保以爲非宜陳之曰臣伏尋亡叛之由皆出於



窮通今立殊制於事爲苦又尋此制施一邦而已若其是邪則應與天下爲一若其非邪亦不宜獨行一郡由此制停歷丹陽尹會稽太守太常吳郡太守文帝以玄係廉素寡欲故頻授各郡爲政雖無殊績而去後常必見思不營財利產業儉薄文帝嘗曰人仕宦非唯須才亦須運命每有好官缺我未嘗不先憶羊玄係元凶弑立以爲吏部尚書領國子祭酒及孝武入伐朝士多南奔劭集群僚橫刀怒曰卿等便可去矣衆竝懼莫敢言玄係容色不異徐曰臣其以死奉朝劭爲解孝武卽位爲金紫光祿大夫以謹敬見知大明五年加散騎常侍特進玄係自少至老謹於祭奠四時珍新未得祠薦者口不妄嘗卒謚曰定子子戎少有才氣而輕薄少行檢語好爲雙聲江夏王義恭嘗設齋使戎布牀須臾王出以牀狹乃自開牀戎曰官家恨狹更廣八分王笑曰卿豈唯善雙聲乃

辯士也文帝好與玄係碁常中使至玄保曰今日上何召我邪戎曰金溝清泚銅池搖颺旣佳光景當得劇碁玄保常嫌其輕脫云此兒必亡我家位通直郎坐與王僧達謗時政賜死死後孝武帝引見玄保玄保謝曰臣無日禫之明以此上負上美其言戎二弟文帝竝賜名曰咸曰粲謂玄係曰欲令卿二子有林下正始餘風玄係旣善碁而何尚之亦雅好其事吳郡褚胤年七歲便入高品及長冠絕當時胤父榮期與臧質同逆胤應從誅何尚之固請曰胤弈碁之妙超古冠今魏犇犯令以材獲免父戮子宥其例甚多特乞與其微命使異術不絕不許時人痛惜之玄係兄子希字泰聞少有才氣爲尚書左丞時揚州刺史西陽王子尚上言山湖之禁雖有舊科人俗相因替而不奉焮山封水係爲家利自頃以來頽弛日甚富強者兼嶺而占貧弱者薪蘇無託至漁採之地亦又

如茲斯寔害人之深弊爲政所宜去絕損益舊條更申恒制有司  
檢壬辰詔書占山護宅強盜律論賊一丈以上皆棄市希以壬辰  
之制其禁嚴刻事既難遵理與時弛而占山封水漸染復滋更相  
因仍便成先業一朝頓去易致嗟怨今更刊革立制五條凡是山  
澤先恒燠燠養種竹木雜果爲林芴及陂湖江海魚梁鱠紫場恒  
加功修作者聽不追奪官品第一第二聽占山三項第三第四品  
二項五十畝第五第六品二項第七第八品一項五十畝第九品  
及百姓一項皆依定格條上貲簿若先已占山不得更占先占闕  
少依限占足若非前條舊業一不得禁有犯者水土一尺以上竝  
計贓依常盜律論停除咸康二年壬辰之科從之時益州刺史劉  
瑀先爲右衛將軍與府司馬何季穆共事不平季穆爲尚書令建  
平王宏所親待屢毀瑀於宏會瑀出爲益州奪士人妻爲妾宏使

希舉察之瑀坐免官瑀恨希切齒有門生謝元伯往來希間瑀密  
令訪訊被免之由希曰此奏非我意瑀卽日到宏門奉牋陳謝云  
聞之羊希希坐漏泄免官泰始三年爲寧朔將軍廣州刺史四年  
希以沛郡劉思道行晉康太守領軍伐俚思道違節失利希遣收  
之思道不受命率所領襲州希踰城走思道獲而殺之希子崇字  
伯遠尚書主客郎丁母憂哀毀過禮及聞廣州亂卽日便徒跣出  
新亭不能步涉頓伏江渚門義以小船致之父葬畢乃不勝哀而  
卒

沈演之字臺真吳興武康人也高祖克晉車騎將軍吳國內史魯  
祖勁冠軍陳祐長史戍金墉爲燕將慕容恪所陷不屈見殺贈東  
陽太守祖赤黔廷尉卿父叔任少有幹質朱齡石伐蜀爲齡石建  
威府司馬平蜀之功亞於元帥以功封寧新縣男後拜益州刺史

卒演之年十一尚書僕射劉柳見而知之曰此童終爲令器沈氏家世爲將而演之折節好學讀老子百徧以義理業尚知名襲父別爵吉陽縣五等侯舉秀才爲嘉興令有能名元嘉中累遷尚書吏部郎先是劉湛劉斌等結黨欲排廢尚書僕射殷景仁演之雅杖正義與景仁素善盡心朝廷文帝甚嘉之及彭城王義康出蕃誅劉湛等以演之爲右衛將軍景仁尋卒乃以後軍長史范曄爲左衛將軍與演之對掌禁旅同參機密尋加侍中文帝謂之曰侍中領衛望實優顯此蓋宰相便坐卿其勉之上欲伐林邑朝臣多不同唯廣州刺史陸徽與演之贊成上意及林邑平賜群臣黃金生口銅器等物演之所得偏多上謂曰廟堂之謀卿參其力平此遠夷未足多建茅土廓清舊都鳴鸞東岱不憂河山之不開也二十一年詔以演之爲中領軍太子詹事范曄懷逆謀演之覺其有

異言之文帝羸尋伏誅歷位吏部尚書領太子右衛率素有心氣寢病歷年上使臥疾理事性好舉才申濟屈滯而謙約自持上賜女伎不受暴卒文帝痛惜贈金紫光祿大夫謚曰貞子睦位黃門侍郎與弟西陽王文學勃忿閤坐徙始興郡勃輕薄好利位太子右衛率加給事中坐贓賄徙梁州後還給事阮佃夫王道隆等位司徒左長史爲後廢帝所誅演之兄子坦之仕齊位都官郎坦之子顓

顓字處默幼清靜有至行慕黃叔度徐孺子之爲人讀書不爲章句著述不尚浮華嘗獨處一室人罕見其面從叔勃貴顯每還吳興賓客填咽顓不至其門勃就之顓送迎不越閭勃歎曰吾乃今知貴不如賤也顓內行甚修事母兄孝友兄昂一名顓亦退素以家貧仕爲始安令兄弟不能分離相隨之任齊永明年中徵拜著

南史三十六  
作郎太子舍人通直郎竝不起文惠太子嘗擬古詩云磊磊落落  
玉山崩顛聞之曰此讖言也既而太子薨至秋武帝崩鬱林海陵  
相次黜辱覲素不事家產及昂卒逢齊末兵荒與家人并日而食  
或有饋其梁肉者閉門不受唯採蓴苻根供食以樵採自資怡怡  
然恒不改其樂梁天監四年大舉北侵南陽樂藏爲武康令以顛  
從役到建鄴揚州別駕陸任以書與吳興太守柳惲責之不能甄  
善別賢惲大慙卽表停之卒家所著文章數十篇

憲字彥璋演之從祖弟子也祖說道巴西梓潼二郡太守父僕之  
北中郎行參軍憲少有幹局爲駕部郎宋明帝與憲棊謂曰卿廣  
州刺史材也補烏程令甚著政績太守褚彥回歎美以爲方圓可  
施少府管掌煩冗材幹者竝更其職憲以吏能累遷少府卿武陵  
王曄爲會稽以憲爲左軍司馬齊高帝以山陰戶衆欲分爲兩縣

武帝啟曰縣豈不可御但用不得人耳乃以憲帶山陰令政聲大  
著孔珪請假東歸謂人曰沈令料事特有天才後爲晉安王後軍  
長史廣陵太守西陽王子明代爲南兗州憲仍留爲冠軍長史太  
守如故永平八年子明典籤劉道濟贓私百萬爲有司所奏賜死  
憲坐不糾免官後除散騎常侍未拜卒當時稱爲良吏憲同郡丘  
仲起先是爲晉平郡清廉自立褚彥回歎曰目見可欲心能不亂  
此楊公所以遺子孫也仲起字子震位至廷尉卒

憲孫浚字叔源少涉學有才幹仕梁歷山陰吳建康三縣竝有能  
名太清二年累遷御史中丞時臺城爲侯景所圍外援竝至景表  
請和求解圍還江北詔許之遣右衛將軍柳津對景盟歛景知城  
內疾疫稍無守備因緩去期城內知其背盟復舉烽鼓譟後數日  
景復進表請和簡文使浚往景曰卽日向熱非復行時政欲

立效求停君可見為申聞浚曰大將軍此意意在得城下風所聞  
久已乏食城內雖困尚有兵糧朝廷恐和好乖貳已密敕外軍若  
臺城傾覆勿以二宮為念當以死雪耻若不能決戰當深壁自守  
大將軍十萬之眾將欲何資景橫刀於膝瞋目叱之浚乃正色責  
景曰河南王人臣而舉兵向闕今朝廷已赦王罪結盟口血未乾  
而復翻背沈浚六十之年且天子使也奉命而行何用見脅徑去  
不顧景歎曰是真司直也然密銜之又勸張嶷立義後得殺之  
江夷字茂遠濟陽考城人也祖晉護軍將軍父歆驃騎諮議參軍  
夷少自藻厲為後進之美宋武帝板為鎮軍行參軍豫討桓玄功  
封南郡州陵縣五等侯累遷大司馬武帝命大司馬府琅邪國事  
一以委焉武帝受命歷位吏部尚書吳郡太守營陽王於吳縣見  
害夷臨哭盡禮以兄疾去官後為右僕射夷美風儀善舉止歷任

以和簡著稱出為湘州刺史加散騎常侍未之職卒遺令薄斂蔬  
奠務存儉約子湛

湛字徽深居喪以孝聞愛文義善彈碁鼓琴兼明算術為彭城王  
義康司徒主簿太子中舍人司空檀道濟為子求娶湛妹不許義  
康有命又不從時人重其立志義康之盛人競求自昵唯湛自疎  
固求外出乃以為武陵內史隨王誕為北中郎將南徐州刺史以  
湛為長史南東海太守委以政事元嘉二十五年徵為侍中任以  
機密遷左衛將軍時改選學職以太尉江夏王義恭領國子祭酒  
湛領博士轉吏部尚書家甚貧不營財利餉饋盈門一無所受無  
兼衣餘食嘗為上所召遇澣衣稱疾經日衣成然後起牛餓御人  
求草湛良久曰可與飲在選職頗有刻覈之譏而公平無私不受  
請謁論者以此稱焉初上大舉北侵舉朝謂為不可唯湛贊成之及

魏太武至瓜步以湛兼領軍軍事處分一以委焉魏遣使求昏上  
召太子劭以下集議眾竝謂宜許湛謂許之無益劭怒謂湛曰今  
三王在阨詎宜苟執異議聲色甚厲坐散俱出劭使班劍及左右  
推排之始於傾倒劭後宴集未嘗命湛上乃爲劭長子偉之娉湛  
第三女欲以和之上將廢劭使湛具詔草劭之入殺湛直上省聞  
叫乃匿傍小屋劭遣求之舍吏給云不在此兵卽殺舍吏乃得見  
湛湛據窓受害意色不撓五子恚怒慈法壽皆見殺初湛家數  
見怪異未敗少日所眠牀忽有數斗血孝武卽位追贈左光祿大  
夫開府儀同三司謚曰忠簡公恁位著作佐郎恁子敦

敦字叔文母宋文帝女淮陽長公主幼以戚屬召見孝武謂謝莊  
曰此小兒方當爲名器少有美譽尚孝武女臨汝公主拜駙馬都  
尉爲丹陽丞時袁粲爲尹見敦歎曰風流不墜政在江郎敦與宴

賞留連日夜遷中書郎敦庶祖母王氏老疾敦視膳嘗藥七十餘  
日不解衣及累居內官每以侍養陳請朝廷優其朝直初湛娶褚  
秀之女大義不終褚彥回爲衛軍重敦爲人先通意引爲長史隨  
府轉司空長史領臨淮太守轉齊高帝太尉從事中郎齊臺建爲  
吏部郎高帝卽位敦以祖母久疾故求自解初宋明帝敕敦出繼  
其叔恁爲從祖淳後於是僕射王儉啟禮無後小宗之文近代緣  
情皆由父祖之命未有旣孤之後出繼宗族也雖復臣子一揆而  
義非天屬江忠簡胤嗣所寄唯敦一人傍無蕃屬敦宜還本若不  
欲江恁絕後可以敦小兒繼恁爲孫尚書參議謂問世立後禮無  
其文荀顛無子立孫墜禮之始何琦又立此論義無所據於是敦  
還本家詔使自量立後者出爲豫章內史還除太子中庶子未拜  
門客通贓利武帝遣使檢覆敦藏此客而躬自引咎上甚有怪色

王儉從容啟上曰江敦若能臨郡此便是具美耳上意乃釋承明中爲竟陵王司馬敦好文辭圍碁第五品爲朝貴中最遷侍中歷五兵尚書東陽吳二郡太守復爲侍中轉都官尚書領驍騎將軍王晏啟武帝曰江敦今重登禮閣兼掌六軍慈渥所覃寔有優忝但語其事任殆同閑輩天旨旣欲升其名位愚謂以侍中領驍騎望實清顯有殊納言上曰敦常啟吾爲其鼻中惡今旣以何胤王瑩還門下故有此回換耳先是中書舍人紀僧真幸於武帝稍歷軍校容表有士風謂帝曰臣小人出自本縣武吏邀逢聖時階榮至此爲兒昏得苟昭光女卽時無復所須唯就陛下乞作士大夫帝曰由江敦謝瀟我不得措此意可自詣之僧真承旨詣敦登榻坐定敦便命左右曰移吾牀讓客僧真喪氣而退告武帝曰士大夫故非天子所命時人重敦風格不爲權倖降意隆昌元年爲侍

中領國子祭酒鬱林廢朝臣皆被召入宮敦至雲龍門方知廢立散動醉吐車中而去明帝卽位改領秘書監又改領晉安王師卒遺令不受賻贈詔賻錢三萬布百匹子蒨啟遵敦命不受詔嘉美之從其所請贈散騎常侍太常卿謚曰敬子子蒨

蒨字彥標幼聰警讀書過口便誦選爲國子生舉高第起家秘書郎累遷廬陵王主簿居父憂以孝聞廬于墓側明帝敕遣齋仗二十人防之墓所服闋累遷建安內史梁武帝起兵遣寧朔將軍劉譏之爲郡蒨拒之及建鄴平蒨坐禁錮俄被原歷太尉臨川王長史尚書吏部郎領右軍方雅有風格僕射徐勉權重唯蒨及王規與抗禮不爲之屈勉因蒨門客翟景爲子繇求昏於蒨女不荅景再言之乃杖景四十由此與勉忤勉又爲子求蒨弟葺及王泰女二人竝拒之葺爲吏部郎坐杖曹中幹免官泰以疾假出宅乃遷

散騎常侍皆勉意也初天監六年詔以侍中常侍竝侍帷幄分門  
下二局入集書其官品視侍中而非華胃所悅故勉斥泰爲之蒨  
尋遷司徒左長史初王泰出閣武帝謂勉云蒨資歷應居選部  
勉曰蒨有眼患又不悉人物乃止遷光祿大夫卒謚肅蒨好學尤  
悉朝儀故事撰江左遺典三十卷未就卒文集十五卷蒨弟曇字  
彥德少學涉有器度位侍中太子詹事承聖初卒曇弟祿

祿字彥遐幼篤學有文章工書善琴形貌短小神色俊發位太子  
洗馬湘東王錄事參軍以氣陵府王王深憾焉廬陵威王續代爲  
荊州留爲驃騎諮議參軍獻書告別王荅書乃致恨祿先爲武寧  
郡頗有資產積錢於壁壁爲之倒迕銅物皆鳴人戲之曰所謂銅  
山西傾洛鍾東應者也湘東王恨之旣深以其名祿改字曰榮財  
以志其忿後爲唐侯相卒撰列仙傳十卷行於世及并絜臯木人

賦敗船詠竝以自喻子徽亦有文采而清狂不慧常以父爲戲蒨

子緡

緡字含絜幼有孝性年十三父蒨患眼緡侍疾將暮月衣不解帶  
夜夢一僧云患眼者飲慧眼水必差及覺說之莫能解者緡第三  
叔祿與草堂寺智者法師善往訪之智者曰無量壽經云慧眼見  
真能度彼岸蒨乃因智者啓也同夏縣界牛屯里舍爲寺乞賜嘉  
名敕荅云純臣孝子往往感應晉時顏含遂見冥中送藥又近見  
智者以卿第二息夢云飲慧眼水慧眼則五眼之一號可以慧眼  
爲名及就創造泄故井井水清冽異於恒泉依夢取水洗眼及煮  
藥稍覺有瘳因此遂差時人謂之孝感南康王爲徐州召爲迎主  
簿緡性沈靜好莊老玄言尤善佛義不樂進仕及父卒緡廬于墓  
終日號慟不絕聲月餘乃卒子摠



摠字摠持七歲而孤依于外氏幼聰敏有至性元舅吳平侯蕭勵名重當世特所鍾愛謂曰爾神采英拔後之知名當出吾右及長篤學有文辭仕梁爲尚書殿中郎武帝撰正言始畢製述懷詩摠預同此作帝覽摠詩深見嗟賞轉侍郎尚書僕射范陽張纘度支尚書琅邪王筠都官尚書南陽劉之遴竝高才碩學摠時年少有名纘等雅相推重爲忘年友會之遴嘗酬摠詩深相欽挹累遷太子中舍人侯景寇建鄴詔以摠權兼太常卿守小廟臺城陷避難會稽郡憩於龍華寺乃製修心賦摠第九舅蕭勃先據廣州又自會稽徃依焉及元帝平侯景徵爲始興內史會魏剋江陵不行自此流寓嶺南積歲陳天嘉四年以中書侍郎徵還累遷左戶尚書轉太子詹事摠性寬和溫裕尤工五言七言溺於浮靡及爲宮端與太子爲長夜之飲養良娣陳氏爲女太子亟微行遊摠家宣帝

怒免之後又歷侍中左戶尚書後主卽位歷吏部尚書僕射尚書令加扶旣當權任宰不持政務但日與後主遊宴後庭多爲豔詩好事者相傳諷翫于今不絕唯與陳暄孔範王瑳等十餘人當時謂之狎客由是國政日頽綱紀不立有言之者輕以罪斥之君臣昏亂以至于滅禎明三年陳亡入隋拜上開府開皇十四年卒於江都年七十六其爲自序云太建之時權移群小諂嫉作威屢被摧黜奈何命也識者譏其言跡之乖有文集三十卷長子溢頗有文辭性傲誕驕物雖近屬故友不免詆欺歷中書黃門侍郎太子中庶子入隋爲秦王文學卒

江智深夷之弟子也父僧安宋太子中庶子夷有盛名夷子湛又有清譽父子竝貴達智深父少無名問湛禮敬甚簡智深常以爲恨自非節歲不入湛門及爲隨王誕後軍參軍在襄陽誕待之甚

南史三十六  
厚時諮議參軍謝莊主簿沈懷文與智深友善懷文每稱曰人所應有盡有所應無盡無者其江智深乎元嘉末除尚書庫部郎時高流官序不爲臺郎智深門孤援寡獨有此選意甚不悅固辭不拜後爲竟陵王誕司空主簿記室參軍領南濮陽太守遷從事中郎誕將爲逆智深悟其機請假先反誕事發卽除中書侍郎智深愛好文雅辭采清贍孝武深相知待恩禮冠朝上宴私甚數多命群臣五三人遊集智深常爲其首同侶未及前輒獨蒙引進每以越衆爲慙未嘗有喜色每從遊幸與群僚相隨見傳詔馳來知常呼已聳動愧慙形於容貌論者以此多之遷驍騎將軍尚書吏部郎上每酣宴輒詆群臣并使自相嘲訐以爲歡咲智深素方退漸不會旨上嘗使王僧朗戲其子景文智深正色曰恐不宜有此戲上怒曰江僧安癡人癡人自相惜智深伏席流涕由此恩寵大衰

出爲新安王子鸞北中郎長史南東海太守行南徐州事初上寵姬宣貴妃殷氏卒使群臣議謚智深上議曰懷上以不盡嘉號甚銜之後車駕幸南山乘馬至殷氏墓群臣皆騎從上以馬鞭指墓石柱謂智深曰此柱上不容有懷字智深益惶懼以憂卒子筠太子洗馬早卒後廢帝皇后筠之女也廢帝卽位以后父追贈金紫光祿大夫筠妻王平望鄉君智深兄子槩早孤智深養之如子槩歷黃門吏部郎侍中武陵王贊北中郎長史

江秉之字玄叔濟陽考城人也祖適晉太常父纂給事中秉之少孤弟妹七人竝幼撫育姻娶盡其心力宋少帝時爲永世烏程令以善政著名東土徵爲建康令爲政嚴察部下肅然後爲山陰令人戶三萬政事繁擾訟訴殷積階庭常數百人秉之御繁以簡常得無事宋世唯顧覲之亦以省務著績其餘雖復刑政修理而未

能簡事以在縣有能出補新安太守元嘉十二年轉在臨海竝以  
簡約見稱卒於官所得秩悉散之親故妻子常飢寒人有勸其營  
田秉之正色荅曰食祿之家豈可與農人競利在郡作書案一枚  
去官留以付庫秉之宗人邃之字玄遠頗有文義撰文釋傳於世  
位司徒記室參軍秉之子徽尚書都官郎吳令元凶殺徐湛之子  
徽以黨與見誅于謚

謚字令和父徽遇禍謚繫尚方宋孝武平建鄴乃得出爲于湖令  
強濟稱職宋明帝爲兗州謚傾身奉事爲帝所待卽位以爲驃騎  
參軍弟蒙貌醜帝常召見狎侮之謚再遷右丞兼比部郎太始四  
年江夏王義恭第十五女卒年十九未笄禮官議從成人服諸王  
服大功左丞孫夔重奏禮記女子十五而笄鄭玄云應年許嫁者  
也其未許嫁者則二十而笄射慈云十九猶爲孀禮官違越經典

於理無據太常以下結免贖論謚坐杖督五十奪勞百日謚又奏  
夔先不研辯混同謬議準以事例亦宜及咎夔又結免贖論詔可  
出爲建平王景素冠軍長史長沙內史行湘州事政教苛刻僧遵  
道又與謚情款隨謚莅郡犯小事餓繫郡獄僧遵道裂三衣食之  
盡而死爲有司奏徵還明帝崩遇赦免齊高帝領南兗州謚爲鎮  
軍長史廣陵太守入爲遊擊將軍性疏俗善趨時利元徽末朝野  
咸屬意建平王景素謚深自委結景素事敗僅得免禍蒼梧王廢  
後物情尚懷疑貳謚獨竭誠歸事齊高帝昇明元年爲黃門侍郎  
領尚書左丞沈攸之事起議加高帝黃鉞謚所建也事寧遷吏部  
郎齊建元元年位侍中旣而驃騎豫章王嶷領湘州以謚爲長史  
封永新縣伯三年爲左戶尚書諸皇子出閣用文武王帥悉以委  
謚尋敕選曰江謚寒士誠當不得競等華儕然甚有才幹可遷掌

吏部謚才長刀筆所在幹職高帝崩謚稱疾不入衆頗疑其怨不  
預顧命武帝卽位謚又不遷官以此怨望時武帝不豫謚詣豫章  
王疑請問曰至尊非起疾東宮又非才公今欲何計武帝知之出  
謚爲鎮北長史南東海太守未發憂甚乃以奕棊占卦云有客南  
來金椀玉杯上使御史中丞沈冲奏謚前後罪惡請收送廷尉詔  
賜死果以金罍盛藥鳩之子介建武中爲吳令政亦深苛人門榜  
死人髑髏爲謚首介棄官而去

論曰敬元夷簡歸譽玄保弘懿見推其取重於世豈虛名也然玄  
保時隆帝念雖命稟於玄天跡其恩寵蓋亦猶賢之助沈氏世傳  
武節而演之以業尚見知綢繆帷幄遂參機務處默保閑篤素叔  
源節見臨危懿德高風所謂世有人矣茂遠自晉及陳雅道相係  
奕世載德斯之謂焉而摠溺於寵狎反以文雅爲敗然則士之成

名所貴彬彬而已玄叔清介著美足以追蹤古烈令和窺覘成性  
終取躋於險塗宜矣

南史卷三十六  
列傳第二十六  
終

張川中鳳園  
氏書

玉本

十四

